

Ēnēma Ngönte

Yesu wel wiak kutömweri sēen wē krismaki 60 ma 65 pōta ök won sēen Sonök ingre mor saurōaan retēng ēa. Ingre mor saō porōa Yesu Kristo pi Aköp pēl wesa pōtaan kēlangōn kat yawiem Sonök kosang sak öpēnēak kent ēa. Son pi kus nent yapinte Patmos pōtak wii kaatak wēen Anutuuk wangarōtē yemangk pōl elmēak omēn ēnēm orōöpnaatōn pet elmēa. Wangar pōtē kēlangōn kēsang yaarōōn Yesuuk Setenre kōōre tok muntarō il mowesak piin kon wi kosang yewesaurō kutōmre yang ngolöpōtē öpenēak pet elmēen ök niia.

Pöt epēl wia.

Ngön ngēs rēaut *1:1-20*

Ingre mor saō ka 7 pōtēerōaan retēng ēa *2:1-3:22*

Pepewer pesōm ēak wii 7 tēauta ngönte *4:1-8:1*

Kuup 7 pōtē ngönte *8:2-11:19*

Kamal kēsangēpre animaō nga ngaawaarē ngönte *12:1-13:18*

Wangar ke nentere nent mena *14:1-15:8*

Anutuu omnarōaan ya sangēn 7 pōtōn itena *16:1-21*

Papilon kaō utpet wasēn Seten kēlangōn kat wia *17:1-20:10*

Ngön ya kēsangēt orōöpnaat *20:11-15*

Kutōmre yang ngolöpōtre Yerusalem ngolöpō *21:1-22:5*

Ngön mēēt *22:6-21*

1 ¹Ngön epēt ngaanēer elēep wiakaimautak Yesu Kristook tekeri wes wia. Ngön epēt Anutuuk Yesuun pim inēen ruurōen omnant akun wali nasēn wiaan orōöpna pōtōn tekeri wasēpēnēak pet elmēa. Pēl ēen pim ensel namp wes mēen ne Son pim inēen ruupōn ök neeaut. ²Ne Sonök omēn pōtōn itenak Anutuu ngön ök neeaōre Yesu Kristoē omnant tekeri wes nenaō pōtenta poutōn ök yeniak. ³Omēn namp ngön kē orōöpna epēt ngönēnē wa toptak sangk kelēpna pōp ērēpērēp ēēpnaap. Ēn namp ngön pep epweri retēng yeē epēt sangk yekelēn kat wiak ngaarēk öpna pōpta ērēpērēp ēēpnaap. Ngön pōta kēēt orōöpna akunet temanōm yes pōtaanök.

Sonök ingre mor saō ka 7 pōtē wēaurōaan pep retēng ēa

⁴Ne Son nook ngön epēt ingre mor saō Esia yangerak ka 7 pōtē wēaurō arimēen retēng ē yaningk. Anutu ngaan panēer wakaimaup peeneeta

wë wakaim öpnaap piire Ngëengk Pul Anutuu itöök ur pim wel aisëak ngarangk yaalni pöta naë wëäö pöök komre kolapre mayaap pöt ningkën arim naë wiaap. ⁵Ēn Yesu Kristo puukta komre kolapre mayaap pöt ningkën arim naë wiaap. Pi wotpil wesak Anutuu ngönte tekeri wes yaningkaupök wet reäk weletakaan wal ëak yang omp aköröa kaö sak wë.

Pi tapöpök tiarimëen lup sant elniak tiarim kangiir wel wia pötak utpetatë öngpökaan ent ë nuulëa. ⁶Pël ëak puuk niaan piiring kaö sak ngarangk eim kiri ar yaauröa ök Anutu pim Pepapë inëen sak omnaröaan kimang yamëäurö. Tiar pourö Yesu Kristo pim yapinte wak ngaarëk isak yemaan ngarangk elnieim öp. Yaap.

⁷Kat wieë. Yesu pi kutöm kepilötring wais oröön omën pourö itaampenaat, omën pim wel wiipënëak elmëa pöröaring. Pël ëak yangerakë omën pourö piin itenak pitëm utpet elmëautaan kangut mampnaaten ya ngës ëen ing kaö apnaat. Yaap pan.

⁸Aköp Anutu weëre kosang pepap, ngaan wakaimaup peeneeta wë wakaim öpnaap, pi epël ya. “Ne tapöp wot reäupök kaalak ënem remaap.”

Son pi Kristoon itena

⁹Ne Son, arim karip, tiar Yesuring yal menak wëen Anutuuk wa ngaöök nimëen këlangön kat wieimeë kosang sak wë. Nem Anutuu ngönte ök neeaöre Yesu Kristoë omnant tekeri wes nenautön ök yaautaan kööre toköröak Patmos kustak neulëaut. ¹⁰Pël ëen Sante, Aköpë akun pötak Anutuu Ngëengk Pulö pim weëre kosangöök nem naë oröön ne kat wiin nem kasngaëlaan kuup nga ngön naöökë ya pöl ngön ëak ¹¹epël ya. “Omnant nim itaampë epot pout pepeweri retëng ëak ka 7, Epesasre Simenaare Pekamamre Tiatiraare Satisre Pilatepiaare ën Leotisia ka potë ingre mor sauröaan wes momëem.”

¹²Pël yaan ne talëpök nem kasngaëlaan ngönaak yenëa pöten itaampa yak kaip ti itaangkën es rampe koolötök ket ëa 7 ëak wieëa. ¹³Pël ëen ne itaangkën namp es rampe pötë tekrak wëa. Pöp omnampë ök sak ulpëen wali el wesak së ingesiarë il menaö namp mëak yepat koolötök ket ëa naö pim riperek rëëwarök ëak wëa. ¹⁴Pim kepön ëpöt kölam panëp, int awang ëpre uröam lup kölamötë ök. Ēn itöörar pöt es wëlëngöökë ök panëöörar, omnant omnaröa lupötë wieëautön ityaangkaup. ¹⁵Ēn pim ing pöwesiarta aini ke nal nent yapinte paras pël yema pöt es kësangwesi ar ëak ompyaö wasën simpelang yera pöta ök yeëa. Ēn pim këm ngön pömpel iitë nga yaurem kuk ya pöl yeëa. ¹⁶Pim mor yaapkëëwesi ari 7 ëak wali weëa. Öp newerta nalaan nal nga panëëwer pim këmtakaan oröak irëëëa. Ēn pim këere wot kante këtëpë nga panë yema pöl ëëëa.

¹⁷Ne piin itenak yaan sak imën kön sak kawi ngentiak së pim ingesiarë naë ilëaut. Pël ëënak pim mor yaapkëëwes nem rangk nowiak epël yenëa.

“Ni kas ēengan. Ne wot rēaupök kaalak ěnem remaap. ¹⁸Kat wi. Ne wēwē pepapök wel wiak wal ēaup, peene om öp wē wakaim ömaap. Pēl ēēē welere wel kakē kaō sak wē. Pōtaanök nook kan pōwer tēak omnarō wal ē moulmēmēak pöt pangk pēl ēēmaap. ¹⁹Pōtaanök nim omēn ityaangkēn epot retēng ēēm. Omnant peene epotre ěnēmak orōöpna pout pēl ēēm. ²⁰Nim itaangkēn ari 7 ēak nem mor yaapkēēwesi wak wēan pōtre ěn es rampe 7 ēak wieēa pöt ngōn kepōn nent. Pōta songōnte epēt. Ari 7 pipot ingre mor saō ka 7 pōtē wē pōrōa ngarangkörōen ya. Ēn es rampe koolōtök ket ēa 7 pōt ingre mor saō ka 7 pōtē wēaurōen ya.”

Epesas kakē ingre mor saurōa ngōnte

2 ¹Akōp es rampeetē tekarak wēaō pōpök epēl yenēa. “Ni Epesas kakaan ingre mor saurōaan epēl retēng ē.

“Ngōn epēt omēn mor yaapkēēwesi ari 7 ēak wali wak es rampe koolōtök ket ēa 7 pōtē tekarak kan ing yaap nem ngōnte. ²Ne arim omnant yaautōn ēwat wē. Ar ya kosang mēmpōöre kēlangōn kat yawiem kosang sak wē pēl yaaō pōten ēwat wē. Ēn pēl yeem ar utpet omnarōa yaautōn kaaō ēēn omēn pitēmtēn, ‘Ten Kristoē ngōn yaaō omnarō,’ pēl kaar yaaurōen wēl ēak itenak pit kaar yaaurō pēl kōn wian pōtenta ēwat wē. ³Ēn omēn narō pit itaangkēn ar nemorō pēl sēēn utpet yaniwasēnak kaaō ēēn sēp nenewasēn kēlangōn kat yawiem kosang sak wēaō pōtenta ne ēwat wē. ⁴Pēl yaautak omēn eptaan arēn kōn wiin pangk naēn yaē. Ngaantak ngēs rēak kōn wi kosang wesang pōtak arim lup sant ēan pōt won sē yes. ⁵Ngaan ar wēwē ompyaut wakaimaurōak wiap sak sēp wesang. Pōtaanök arim wēwē ngaan pōten kaalak kōn wiak ōn. Pēl ēak lup kaip tiak wēwē wet rēak wakaiman pōl ōn. Ēn lup kaip natiin ēēnē pōt ne arim naē orōak arim es rampewes kama wēēn ingre mor saurō won sēnēēt. ⁶Arim wēwē ompyaut wakaiman pōt sēp wesautak omēn eptaan kōn wiin ompyaō yaē. Nem Nikolasre pim ingre morōrōa wēwē utpetatēēn kaaō yaalmē pōl arta yaalmē.

⁷“Katringōrōak Ngēēngk Pulōök ingre mor saurōen ngōn ōk yenia pipēt kēkē kat wiin. Omēn namp pim wēwē ompyautak utpetat il wesak kosang sak ōpna pōpōn nook, ‘Ni wēwē kosangta kēraamentēkaan ulōpōrō neim ōmēēp,’ pēl ōk memaap. Kēra pōment Anutuu ya lupōök wē.”

Simena kakē ingre mor saurōa ngōnte

⁸Akōpök kaalak neen epēl ōk yenēa. “Ni Simena kakaan ingre mor saurōaan epēl retēng ē.

“Ngōn epēt omēn wot rēaupök ěnem remaap, wel wiak kaalak wal ēak öp wēaup nem ngōnte. ⁹Arim kēlangōn kat yawi pōten ne ēwat wē. Ēn omnantēēn elek panē yeē pōtenta. Pēl yeēetak kutōmweri arimēēn

omnant kēsang wia. Ēn omēn narō pitēmtēn, ‘Ten Yuta omnarō,’ pēl ya pōrōak utpet wesak yenia pōtenta ne ēwat wē. Pit, ‘Ten Yuta omnarō,’ pēl yaatak Yuta omēn yaapōrō won, Setenē ingre mor panē saurō. ¹⁰ Arim omēn kēlangōn kat wiinēak yeē epten kas ēēnganok kat wieē. Seten pi ar narō morōk elniipēnēak omēn narōen maan wii kaatak nuulēēpnaat. Pipēt ar kēlangōn wak imeē kēt moresiar pēl sēnēēt. Pēl ēēnēetak Anutuun kōn wi kosang weseim wē wel wiinē pōt nook wēwē kosangēt ningkēn neering wakaim ōpnaat.

¹¹ “Katringōrōak Ngēēngk Pulōōk ingre mor saurōen ngōn ōk yenia pipēt kēēkē kat wiin. Omēn namp pim wēwē ompyautak utpetat il wesak kosang sak ōpna pōp es parēāōōk sē kēlangōn kat nawiiipan.”

Pekamam kakē ingre mor saurōa ngōnte

¹² Akōpōk kaalak neen epēl ōk yenēa. “Ni Pekamam kakaan ingre mor saurōaan epēl retēng ē.

“Ngōn epēt omēn ōp nalaan nal nga panēēwer weēaup nem ngōnte. ¹³ Ne arim kakēn ēwat wē. Seten pi ka pipōōkē kaō sak wēēn omnarō utpet kaō panē yaaurō. Pēl yaaurōak kōn wi kosang yewesaut taē wak wē. Ēn ngaan arim karip Antipas wotpil wesak nem ngōnte omnarōen ōk maō ima pōp omēn utpet narōak arim kak Setenē ngarangk yaalmēa pōrek pi mēn wel wia akun pōtak kasēng nenemangkēn kōn wi kosang neweseimaurō. ¹⁴ Pēl ēaurōak arim wēwē utpet epēl yeē epōtōn ne kōn wiin pangk naēn yaē. Ar Pekamam kakaan ingre mor saurōa naēaan narō Pelam pim ngōn kaarta ēnēm yaaurō. Pelam pōp ngaan Pelakēn wetete ōk maan puuk Israel omnarōen morōk maan animaō kōn Anutuū ōkre was kaarōrōaan kiri ar ēaut yenem ōngre omp nga ēaurō. ¹⁵ Ēn arim naēaan narōeta tapēl Nikolasre pim ingre morōrōa ngōn utpetatē ēnēm yaaurō. ¹⁶ Pōtaanōk ar lup kaip tiin. Ēn won ēēnē pōt akun kot panē nentak arim naē wais orōōmaat. Pēl ēak ōp nga nem kēmtak wia epwerring omēn piporōaring nimēmpaat.

¹⁷ “Katringōrōak Ngēēngk Pulōōk ingre mor saurōen ngōn ōk yenia pipēt kēēkē kat wiin. Omēn pim wēwē ompyautak utpetat il wesak kosang sak ōpna pōp kutōmweri kaōmp yapin mana pēl ya pōt nem naē ēlēēp wia epot mempaat. Pēl ēak kēl kōlam naōōta mempaat. Kēl pōōk yapin ngolōp nent retēng ēulmēēmaat. Yapin pōt omēn muntarō kōpēl wēēn omēn kēl pō waapna pōpōkēēr ēwat ōpnaat.”

Tiatira kakē ingre mor saurōa ngōnte

¹⁸ Akōpōk kaalak neen epēl ōk yenēa. “Ni Tiatira kakaan ingre mor saurōaan epēl retēng ē.

“Anutuū Ruup pim itōōrar es wēlēngōōkē ōk panēōōrar, omnant omnarōa lupōtē wieēa pōtōn ityaangkaup. Ēn pim ing pōwesiar aini ke

nal nent yapinte paras pël yema pōta simpelang yera pōl yeēa. Ngōn epēt Anutuu Ru ulöpōökōp nem ngōnte. ¹⁹Ne arim omnant yaautōn ēwat wē. Arim lup sant yaaōre kōn wi kosang wesak ya wotpil mēmpō, nemēen yak ya ompyaō mēmpōore kēlangōn kat yawiem kosang sak wē pël yaaō pōtōn ne ēwat wē. Arim wet rēak omnant eiman pōt peene il wesak ompyaō panē yaaurō. ²⁰Pël yaaurōak arim utpet epël yeē pōten ne kōn wiin pangk naēn yaē. Ōng utpet yaaō namp ngaan wakaima yapinte Sesepel pōpē ök yaē pōpōnta arring ōpēnēak mēēaurō. Ōng pōpōk pimtēn, ‘Ne Anutuu tektek ngōn yaaō omēn namp,’ pël kaar mēak ngōnēn kaarōt nem ēnēm yaalnēaurōen ōngre omp nga ēēre animaō kōn Anutuu ōkre was kaarōrōaan kiri ar yaaō pōt nē pël ēēpēnēak morōk yaalmēaup. ²¹Nook pim omp nga yaaō pōt sēp wasēpēnēak akun mangkēn pi lup kaip natiin kaaō ēaup. ²²Kat wi. Ne ōng pōpōn maan yauman ēēpnaat. Ēn omp ōng pōpring utpet yaaō pōrōeta lup kaip natiin yaēen pōt nook maan kēlangōn munt nant pitēm naē orō morēēpnaat. ²³Pël ēak ōng pōpē wēwēeta ēnēm yaaurō mēn wel mowiimaat. Pël ēēn ka nantē ingre mor saurō pōten itenak ne omēn pourōa kōnre lup wēl yaaup pōten ēwat sēpnaat. Ne tapōpōk ar omnarō neenem omnant yaautē kangut nimpaap. ²⁴Omēn munt Tiatira kak wēaurō ar ngōn utpet pōta ēnēm naēn yaaurō. Pël yeem ngōn utpet pōten omēn narōak, ‘Setenē ngōn ōngpōkōt,’ pël ya pōt ar ēwat nasēn yaaurō. Pël yaaō pōrōen epël ök yeniak. Ne kēlangōn munt nant naningan, om epēt pēēn nimpaan. ²⁵Arim wēwē ompyaō yaaō pōt kosang panē wesak ōn. Pël ēēn nemēt kaalak akun nentak wais orōōmaap. ²⁶Namp pim wēwē ompyaotak utpetat il wesak kosang sak wē nem ngōnte ngaarēk weimeē wel wiipna pōp nook weēre kosang menak kōpēl omnarōa kaō wes moulmēēmaap. ²⁷Pël ēēn pi ngarangk ēēē aini sungkōr naō wak wē omnarō yang kaput mōōna kelak unōn yaē pōl kōpēl omēn pōrō elmēēpnaap. Weēre kosang nem mampa pōt nem Pepapōk nenaut. ²⁸Ne omēn pōt menak tangewesta mempaat.

²⁹“Katringōrōak Ngēēngk Pulōōk ingre mor saurōen ngōn ök yenia pipēt kēkē kat wiin.”

Satis kakē ingre mor saurōa ngōnte

3 ¹Akōpōk kaalak neen epël ök yenēa. “Ni Satis kakaan ingre mor saurōaan epël retēng ē.

“Ngōn epēt omēn Anutuu Ngēēngk Pulō wak ari 7 ēak wali wak wēaup nem ngōnte. Ne arim omnant yaautōn ēwat wē. Omnant yaaō pōt omnarōak arimēen, ‘Pit wēwēetaring wēak yaē,’ pël yenia. Ēn nook arim lupōtōn itaangkēn wel wiaurōa ök wē. ²Pōtaanōk wal ēak it nganga seē. Arim kōn wi kosang yewesaō kot wieēaut sasa won sēpanok taē weseē. Arim omnant yaautōn itaangkēn Anutuu ēōetak wotpil naēnōrō. ³Pōtaanōk ngōn rē nuulōn kat wiak wan pōten kōn wiin. Pël ēak ngōn pōt ngaarēk wak lup kaip tiin. Ar wal ēak it nganga

nasēn ēēnē pöt nga omēn nampē yaē pöl nem akuneten köpēl wēēn tapēt pöt orōak kangut nimpaat. ⁴Pēl ēēmaatak ar Satis kakaan omēn narō utpetat naēn yaaurō. Omēn narōa ulpēēn kölamöt pēēn ē yerangia pöl ar wēwē kölam wē. Ne arēn kön wiin wotpilörō. Pötaanök arim ulpēēn kölamöt ē yerangian pöl wēwē kölamtaring neering wakaim önēēt. ⁵Omēn namp pim wēwē ompyautak utpetat il wesak kosang sak öpna pöpökēer ulpēēn kölamöp mē moulmēēmaap. Pēl ēak pim yapinte wēwē kosangta pepeweriaan kērē nemoolanganēēp. Anutu nem Pepapre pim enselörōa ēōetak pi nemop pöt tekeri wesak amaata.

⁶“Katringörōak Ngēēngk Pulōök ingre mor saurōen ngön ök yenia pipēt kēēkē kat wiin.”

Pilatepia kakē ingre mor saurōa ngönte

⁷Aköpök kaalak neen epēl ök yenēa. “Ni Pilatepia kakaan ingre mor saurōaan epēl retēng ē.

“Aköp ne omēn ngēēngkēp. Ne tapöp omēn kē panēēp. Ngaanēer Tewit pim yang omp ak sak wēere kosangring omnarō ngarangk elmēēima pöl nook kutömweri omp ak sak wēere kosangring ngarangk ēēē kanwer tē wiin omēn nampök newariipan. Ēn kanwer wariin nampök pangk natēēpan, won pan. Ngön epēt ne tapöpē ngönte. ⁸Ne arim omnant yaautön ēwat wē. Ar wēere kosang kēsang won wē nem ngönte ngaarēk weiman. Pēl yeem nem yapinte ēlēp nenowasēn tekeri wesak aiman pōten ne ēwat wē. Pötaanök nook kanwer tē nuwiin wiaan omēn nampök yok pangk newariipan. ⁹Kat wieē. Setenē ingre mor arim naē wēaurō pit pitēmtēn, ‘Ten Yuta omnarō,’ pēl kaar yenilaurō. Pit Setenē utpetatē ēnēm yaaurō, Yuta omēn yaapörō won. Omēn pörōen nook maan arim ikanōök rar rē nuwesirak nemtok arimēēn lup sant yaalnian pōten ēwat sēpnaarō. ¹⁰Ar kēlangön kat yawiem kosang sak önēak nem arēn ök yeniak pöt ngaarēk weiman. Pötaanök omēn utpet nant yangerak wēaurōaan morök elmēēmēak yangerakē wes mēēma pöt nook ar ngarangk yaalniin arim naē naarōöpan. ¹¹Ne akun kot nent won sēēn arim ngēsē waisumaap. Pötaanök omēn nampök irikor elniin arim ompyaō yaauta kangut naön ēēnganēēn ompyaut arim naē wia pöt kosang wes wak ön. ¹²Omēn namp pim wēwē ompyautak utpetat il wesak kosang sak öpna pöp nook Anutuu ngönēn tupta möör wapta ök wesak wesir moulmēēmaap. Pēl ēēn pi Anutuu naē kosang sak öpnaap. Pēl ēēn nem yapin ngolöpētere Anutuu yapintere pim ka kaōaōökēt piik retēng ē ulmēēmaap. Ka pōökē yapinte Yerusalem ngolöpō, kutömweri nem Pepapē naēaan irapnaō.

¹³“Katringörōak Ngēēngk Pulōök ingre mor saurōen ngön ök yenia pipēt kēēkē kat wiin.”

Leotisia kakē ingre mor saurōa ngönte

¹⁴Aköpök kaalak neen epēl ök yenēa. “Ni Leotisia kakaan ingre mor saurōaan epēl retēng ē.

“Aköp nemënt ngön yaapta pepapök wotpil wesak Anutuu ngönte tekeri wesak yaaup. Ne Anutuu omnant pout ket ëa pötë pepap. Ngön epët Aköp nemtë ngönte. ¹⁵Ne arim yaauta songönte ëwat wë. Ar nemëen kaaö panë elnëere lup sant panë elnë pël naën yaaurö. Poutepar arim naë irikor ëak wia. Pötaanök arimtok kaaö panë elnëenëak kön wiak pöt pël elnëenëet. Ēn lup sant panë elnëenëak kön wiak pöt pël elnëenëet. Pël ëenëetak poutepar irikor ëak wi naöpan. ¹⁶Ar pöt nemëen kaaö panë elnëere lup sant panë elnë pël naën yaaö poutepar irikor ëak yeëan. Pötaanök ne arimëen kaaö elniak wa niolamaat. ¹⁷Ar arimtën epël yaaurö. ‘Ten monere uröm omën nant kësang wieëaurö. Omën kësang panë pöt tenimtokëer wak ompyaö wë omën nentaan ngöntök naën yaauröp,’ pël yak. Pël yaketak arim lupre könöt utpetatring wëen omnaröak yaköm elniipna salöröak yak. Arim lupötë omën nantëen ngöntök yeem it il tëak yool wë pöten arimënt itnaangkën wëan. ¹⁸Pötaanök ne arën ök niamaan kat wieë. Ar nem naëaan songre sar ngolöp weë panëet wak ön. Pël ëak arim koröp yool wë pipot ngep ëenëen ulpëen kölam ompyautta nem naëaan ön. Pöt arim koröp yool wë pipot omnaröak it ningankën ëö sënganëen. Pël ëak i kolap nenteta arim itötë wa mëen omën nantön itaampunëen nem naëaan ön. ¹⁹Ne omën nem lup sant yaalmëa pörö pit utpet yaëen pöt ngön kosang mëak wotpil yemowesaup. Pötaanök ar kosang ngentiak lup kaip tiin. ²⁰Kat wieë. Ne ka kanrak tauëë kontkont yaaup. Omën namp ne kontkont yemaan kat wiak kan tē newiin pöt kakaati sē piiring kaömp ngawi nak tenis önaat. ²¹Omën namp pim wëwë ompyautak utpetat il wesak kosang sak öpna pöpön nook, ‘Ni nem naë wais nem omp ak urtak wel aisëak neering omnarö ngarangk ëëpa,’ pël ök memaap. Pöt ne utpetat kasëng menak nem Pepapë naë pim omp ak urtak wel aisëak omnarö ngarangk eim wë pöl arta ëenëet.

²²“Katringöröak Ngëengk Pulöök ingre mor sauröen ngön ök yenia pipët këkë kat wiin.”

Kutömweri omnarö Anutuun yaya maim wë

4 ¹Aköp ngön ök neë pet irën ne wanger yemangk wesak itaangkën kutömweri kan newer tē wieëa. Pël ëen omën kem ngön naö yaan kat wiin nem wet reak kuup ngönöökë ök ngönaak neea tapöpök kaalak epël yenëa. “Ni eprek apër. Pël ëen omën ënem orööpnaatön pet elniimaan,” pël yenëa. ²Pël yenëaan taptakëer Anutuu Ngëengk Pulö pim weëre kosangöök nem naë oröön itaangkën kutömweri Aköpë ur nent wiaan Anutu pötak wel aisëëëa. ³Pim këere wot kante kël köp möaö naöörarën yapintepar saspaare konilian pël yema pöörarë ök pengpeng yeëa. Pël ëen iere kasir naö pim urtak wirö kaörok elmëëëa. Iere kasir pö kël këra ëp koröp oröa naöön yapin emeral pël yema pöökë ök yeëa. ⁴Pël ëaan ur nant 24 ëak omp ak urtak wa taap elmëak wieëa. Pël ëaan

ngarangk naröeta 24 tapël äak ur pötë wel aisëëä. Pit ulpëen wali kölamörö mäak ul koolötök ket äaut omp aköröa yewaëa pötë ököt pitëm kepönötë waëak wëa. ⁵Pël ëen Anutu pim ur wel aisëëä pötakaan kent tangar mënak tangre kaö kësang yera. Pël yaëen pim urta itëkëël es wëlëng 7 äak yokota. Es wëlëng pöt Anutuu Ngëengk Pulö. ⁶Ēn ur pöta itëkëël omën nent i kaöre könitötë ök pan nent wieëa.

Pël äaan kutöm omën mor kong nent wëwëetaring narö tekrak wëa. Pörö omp ak urtak wirö kaörök äak taueëa. Pitëm it ulöpöt kësang pan, koëlaan kasngaël pangk äak oröëä. ⁷Kutöm omën wëwëetaring pörö, namp kent nga laionöröa ököp, namp pol purmakaö ompöröa ököp, namp pi it omën këere wot kan waup, ën namp int tuparöa ököp. ⁸Kutöm omën mor kong nent wëwëetaring pörö pit wer 6 äak uteëa. Ēn pitëm it ulöpöt kësang panë oröëä. Pöt weratë tomökölaan ikanöököl poutë pangk ëëä. Pit pël äak wë Anutuun yaya yaaut leng naën, röökre kët poutë epël maim wë.

“Aköp Anutu ni weëre kosang pout weäup.

Ni wakaimaupök wëen om wakaim ömëëp.

Ni ngëëngkëp, ni ngëëngkëp, ngëëngk panëëp.”

⁹Kutöm omën mor kong nent wëwëetaring pörö pit Anutu omp ak urtak wel aisëëäup wë wakaim om öpnaap piin yaya maimeë ping wesak mäak yoöre ërëp maim wëaurö. Pit pël yaëen ¹⁰ngarangk 24 pörö pit Anutu omp ak urtak wel aisëëä pöpë naë rar rë mowesirak yangerakël tok oriak wë omën wakaim öpna pöpön, “Puukëer weëre kosang pepap,” pël weseë pitëm omp ak ul koolötök ket äa pöt perak urta ikanöök wiak yaya ngön epël maim wëauro.

¹¹ “O Aköp, ni tenim Anutu.

Nuukëer kaö panëëp.

Ten pourö yaya niaimeë ping wesak niak nimtë naë weëre kosang
wia pël yeniaan kë yes.

Nimtok omnant ël epot pout ket äaup.

Nuuk wiaapënäak kön wiak ket ëen om wia.

Pötaanök yaya yeniaan kë yes.”

Sonök pep newer pesöm äak wii tëak wiaan itena

5 ¹Ne kaalak itaangkën Anutu pi omp ak urtak wel aisëëë pim mor yaapkëwesi pep newer weëa. Pep pöweri retëng nant koëlaan kasngaël ëëë. Pël äaan omnaröak wilak sangk kelpänäak pep pöwer tep möak wii 7 äak të ulmëëä. ²Pël äaan ne itaangkën ensel weëre kosangring nemorök ngön ë olëak epël ya. “Omën wotpil talëpök pep epweri wii 7 äak tëa epot pangk ilak pepewer wilëpën?” ³Pël yaan omën nampök o kutömweriaan ma e yangerakaan ma yang epra ikanöökëlaan wotpil nampök pep pöwer wilak itaampnaataan kengkën nasën äaut.

4Pël een ne itaangkën wotpil nampök pep pöwer wilak itaangkën een ing kësang panë äaut. 5Pël een omën ngarangk nampök epël yenëa. “Ni ing anganëp kat wi. Yutaë kurmentëkaan kent laionöpë ök weëre kosang panë namp oröak wë, Tewitë ru äap. Pim wëwë ompyautak utpetat il wesaupök yok pangk wii 7 pöt pout ilak pep pöwer wilëpnaap.”

Son pi Sëpsëp Ruupön itena

6Pël neaan ne itaangkën Sëpsëp Ru namp taueëa. Pöp omën mënauröa ök pim koröpöök ëmpöl ëëëa. Pi Anutuu omp ak urötere kutöm omën mor kong nent wëwëetaring pöröere ngarangköröa tekrak taueëa. Pim kepönöök watöt 7 äak oröëëa. Ēn itötta 7 tapël äak wëa. It 7 pöt Anutu pim Ngëëngk Pulö, kaare yang poutë wes mëen pangk äak wë pö. 7Pël een ne itaangkën Sëpsëp Ru pöpök së Anutu pi pim omp ak urtak wel aisëak wë pep pöwer pim mor yaapkëewesiil wali wak wëen kama yeön itenaut. 8Pël yaëen kutöm omën mor kong nent wëwëetaring pöröere ngarangk 24 pörö Sëpsëp Ru pöpë naë së rar rë mowesirak yangerakël tok oria. Pit omën intöatë ök nant neenemot wak, ën söwar koolötök ket ëa nantta neenemot wak wëa. Söwar pötë öngpök omën nant Anutuun kiri ar ëen es koulöp köp nga kampöt ngaarëk yawisa pöt wieëa. Ēs koulöp kamp ompyaö omnaröa Anutuun yayaare kimang yamëëaut. 9Pit pël äak tan ngolöp nent epël yema.

“Ni omën wotpil kaö panëëp, pepeweri wii tëa pöt yok pangk wa ilumëëp.

Omën naröak ni nimëngkën wel wian.

Pël een wel wian pötak omnarö kaalak Anutu pimëen kama waup. Yaap, ni omën möönre koröp naöre naö, ngön nerere ner, yang poutëërö waup.

- 10 Nuuk maan pit niiring kaö sak wë kiri ar yauröa ök sak tenim Anutu pim inëen sak omnaröaan kimang yamëem wëaurö. Pël äak pit yangerakë omnaröaan ngarangk elmëëpnaarö.”

Omën pourö Sëpsëp Ruupön yaya maim öpenaat

11Pël yemaan ne kaalak itaangkën ensel selap pan këm top äak yaan kat wiaut. Ensel pöröen sangk kelën pöt selap pan tausenre milion pöta ök yes. Pit omp ak urötere kutöm omën mor kong nent wëwëetaring pöröere ngarangkörö wa taap äak taueë 12ngön äak epël ya.

“Sëpsëp Ru omnaröa mën wel wia pöp pi omnant poutë kaö saup, poutë pepap, ëwaare weëre kosangre ëwat wieëaup pël yamëem yaya maimeë ping wesak yemaan kë yes.”

13Pël yaan ne kat wiin omnant pout Anutu pim mor ket ëa, kutömweriaan yangerakë, i kaöökaan yangra ikanöökë, pötök ngönaak aö yesën ne kat wiin epël ya.

“Anutu pim omp ak urtak wel aisēeaupre Sēpsēp Ruup piaripön
yöore ērēpre yaya maimēē ping wesak mēak weēre kosangöt piarpim
naē wia

kēt ēlötē pēl maim öpa.”

¹⁴Pēl yaan kutöm omēn mor kong nent wēwēetaring pöröak, “Yaap,”
pēl yemaan omēn ngarangk pörök wēa pörö piarpim ikanöök rar rē
mowesirak yangerkēl tok oriak yaya yema.

Sēpsēp Ruupök wii 6 ēak tēa pöt pepeweriaan il olēa

6 ¹Ne kaalak itaangkēn Sēpsēp Ru pöpök pepeweri wii 7 ēak tēēa
pötēaan wan pō il yoola. Pēl ēēn ne kat wiin kutöm omēn mor
kong nent wēwēetaring pöröakaan nampök ngön ēak yaan kat wiin pim
kēm ngön pōmpel tangre kaō ket ēak yarēem epēl yema. “Ni wais.” ²Pēl
yemaan ne kaalak itaangkēn pol os kōlam namp wēa. Pöpē rangk omēn
namp raēēp wak wel aisēak wēa. Pēl ēēn omēn pörök wēauröak pi ul
nent waē yemoulmē. Pöt omēn nga wotöök yesauröa ulötē ököt. Pēl ēēn
pi omēn nga ēak il yewesauröa ök nga ēak il mowasēpēnēak sa.

³Sēpsēp Ru pöpök kaalak pepeweri wii tēēa munt 2 pō il yoolaan ne
kat wiin kutöm omēn wēwēetaring pöröakaan munt nampök, “Ni wais,”
pēl yema. ⁴Pēl yemaan pol os munt köp möaō namp yaarö. Pöpē rangk
omēn namp wel aisēēa pöp pitök weēre kosang yemangk. Pöt puuk
maan yangerkak mayaap won sēēn omnarö nener mēmpēnēak weēre
kosang yemangk. Pötaanök omēn pöp pi ya pöt mēmpēna yak öp nga
panē newer yemangk.

⁵Sēpsēp Ruupök kaalak pepeweri wii tēēa munt 3 pō il yoolaan ne
kat wiaan kutöm omēn wēwēetaring pöröakaan munt nampök, “Ni wais,”
pēl yema. Pēl yemaan ne itaangkēn pol os koō namp wēa. Pöpē rangk
omēn namp wel aisēēa pöp pi omēn könömöt wēl yaaō nent sikel pēl
yema pöt wali wak wēa. ⁶Pēl ēēn ne kat wiin kutöm omēn mor kong nent
wēwēetaring pöröa tekrakaan nampök epēl yema. “Omnaröa ya lupötē
kaömp nant utpet mowasēn umön rē sēēn ngöntök ēēp. Pēl yeem kaömp
öpēnēak yaēēn kaömp ompyaut kap kot nentak wesirak mon kēsang 3
kina pōta ngönt wesak mangkēn sum ēēpnaat. Ēn tapēl kaömp utpetat
kap kot nentepar nent pötē wesirēn mon 3 kina tapēl sum ēēpnaat. Pēl
ēēpnaatak ni kaömp utpet yewasēn pit olip kolapring nant ar ēēre wain i
nē pēl ēēpnaat ngöntök ēēpanēn olipre wain yaat utpet mowasngan.”

⁷Pol Sēpsēp Ruupök kaalak pepeweri wii tēēa munt 4 pō il yoolaan
ne kat wiaan kutöm omēn mor kong nent wēwēetaring pöröakaan
munt ēnēm nampök, “Ni wais,” pēl yema. ⁸Pēl ēēn ne itaangkēn pol os
koröpöök kaplak ilēa namp wēa. Pöpē rangk omēn namp wel aisēēa pöp
pim yapinte Wel pēl yema pöp wēa. Pēl ēēn omēn pim ēnēm waisa namp
pim yapinte Wel Kak pēl yema pöpta oröak wēa. Pēl ēēn omēn kutömweri

wëa pöröak yanger kom äak lup 4 wesak piarip yang lup ner menak omën yang pörök wëaurö mën wel wiipënëak weëre kosang yemangk. Pit epël ëëpnaarö. Pitëmënt nener mën wel wiire ën narö këënëën ya sak ilak wel wi, narö yauman ke nentere nent wak wel wiire narö animaö ngaaröak mën wel wi pël ëëpnaarö.

⁹Sëpsëp Ruupök kaalak pepeweri wii téeëa munt 5 pö il yoolaan ne itaangkën omën wel wia naröa könörö Anutuun kiri ar yaaurekë ikanöök wëa. Pörö pit ngaantak Anutuu ngönte taë wes wak wë tekeri weseima pötaanök kööre toköröak mëngkën pitëm könörö Anutuu naë wëa. ¹⁰Omën kön pöröak ngön ë olëak maap epël yema. “O Aköp weëre kosang pepap, ni këëkë wesak wotpil yewesaup. Ni akun taltak yangerakë omnaröaan ngön ya mënak pitëm ten nimëna pöta kangut mamp?” ¹¹Pël yemaan Aköpök omën kön pörö ulpëën kölam waliit neenemot menak epël ök yema. “Ar kaalak akun kot nent kë seim wëën arim kar arring ya ngawi yamëngka narö mën wel wiipënëak yaö mëëa pörö pitta mën wel wiinak ne kangut arim kööre tokörö mempaap.”

¹²Pël yemaan ne itaangkën Sëpsëp Ruupök kaalak pepeweri wii téeëa munt 6 pö il yoolaan moup kësang panë nempel yamö. Pël ëën këtëp kaip tiak maan ne itaangkën poë koröp kouukë ök sak koö olaan ngoonöpta tapël kaip tiak maan omën iitë ök köp möak wëa. ¹³Ën ariatta kutömweriaan ti yangerak ngentiin itaangkën këra nantë ulöpörö köp namöön wiaan kent möak tö olaan wia pötë ök yaë. ¹⁴Ën kutömwerta këra ëpötë pesöm mö yawi pöl ëën won yesën kaö kusre rosiratta tiak nerekaan nereké yaë. ¹⁵Pël yaëën yang omp aköröere ngarangkörö, nga omnaröa wotöököröere monere uröm omnarö, omën weëre kosangringöröere omën pourö, inëën ya yamëngk pöröere omën yaap wëa pörö pit pourö yang öngöpre rosiratë kël öngöp kësangötë ëlëëp ilëak wëa. ¹⁶Pël äak pit ngön ë olëak epël ya. “Këlre rosirat pelak ngep elniip, Anutu pim omp ak urtak wel aisëëë itningampanëën ëlëëp ilepanaan, Sëpsëp Ruupökta ya sangën elniipanëën. ¹⁷Akun kaöaö yaaröön kangut nimpa pöt peene yok oröak wia. Pël ëën Anutüre Sëpsëp Ruup piarip ya sangën elniipnaan yaë. Pötaanök omën talëpökëer nga pöt il wasëpën?”

Israel omën 144,000 pörö Anutuun yaö elmëa

7 ¹Ngön pöt pet irën ne itaangkën ensel 4 äak yang kaö 4 pötë taueëa. Yang kaö 4 pötëaan kent 4 tapël äak wais i kaöre yang, wiire këra pöt möak utpet waspanëak ensel pöröak il warieëa. ²Pël ëën ne itaangkën ensel munt namp këtëpë yengampiaulaan oröak yawisën itenaut. Pi Anutu, wëwë pepapë, omën nent omnarö pimëën yaö wesak yapin mowiipna pöt wali wak is ensel 4 äak Anutuuk yangerere i kaö utpet wasëpënëak weëre kosang mena pöröen ngön ë olëak ngön kosang yamëem ³epël yema. “Ar peenëer teëntom i kaöre yang, wiire këra

pöt utpet wasnganok. Kot nent kor wëen wet rëak omën tiarim Anutu pim inëen yaurö pimëen yaö wesak yapinte pitëm ë kosatë mowiinak ënëmak yok pangk utpet wasënëet.” ⁴Pël yemaan ne kat wiin öngre omp Anutuuk pimëen wesak yapin mowia pörö sangk kelën 144,000 pipël Israel omnaröa kurötë saulaan yaarö. ⁵Pit epël ëa.

Yuta pim kurmentëkaan 12,000,

Rupen pim kurmentëkaan 12,000,

Kat pim kurmentëkaan 12,000,

⁶Asa pim kurmentëkaan 12,000,

Naptalai pim kurmentëkaan 12,000,

Manasa pim kurmentëkaan 12,000,

⁷Simion pim kurmentëkaan 12,000,

Liwai pim kurmentëkaan 12,000,

Isaka pim kurmentëkaan 12,000,

⁸Sepulan pim kurmentëkaan 12,000,

Yosep pim kurmentëkaan 12,000,

ën Pensamin pim kurmentëkaan 12,000.

Omën piporö Anutuuk pimëen wesak pitëm ë kosatë yapin mowia.

Omën kësang panë Anutuun yaya mëäa

⁹Ne omën pöt itenak kaalak itaangkën omën kësang panë wa top ëäk wëa. Pöröen omën nampök yok pangk sangk naalpan. Omën pörö möönre koröp naöre naö, ngön nerere ner, yang poutëerö wais erën ëa. Pit Anutu, pim omp ak urtak wel aisëëëaupre Sëpsëp Ruup piarpim itëkëäl taueëa. Pitëm wëwë ompyautak utpetat il wesautaan ulpëen kölam waliirö mëäk kewis komöt wali wak wëa. ¹⁰Pël ëëë ngön ëäk epël ya. “Tiarim Anutu, pim omp ak urtak wel aisëëëaupre Sëpsëp Ruup piaripök tiar utpetetakaan kama nuun ompyaö wë.” ¹¹Pël yaan ensel pouröak Anutu, pim omp ak urtak wel aisëëëaupre ngarangk 24 pöröere kutöm omën mor kong nent wëwëetaring pörö wirö wa taap elmëäk taueëa. Pël ëäk pit omp ak urta itëkëäl rar rë wesirak tok oriak Anutuun yaya mëäk ¹²epël yema.

“Yaap, tenim Anutu,

ten nimëen ërëpërëp ëäk ping wesak yeniak.

Ëwat pout nimtë näë wiaan yayaare yoöre ërëp yeniak.

Nuukëër weëre kosangring wëaupök

omnant pout pangk ngarangk yeëaup.

Omën pipot pout nim näë wiakaim wiaapnaat.

Yaap.”

Omën eporöa këlangön kat yawia pöt pet ira

¹³Pël yemaan ngarangk 24 pöröa näëaan nampök neen epël pëäl yenëa. “Omën ulpëen kölam waliit mëa eporö talörö? Tarëkaan waisa?”

14 Pël neaan ngön kangit epël yemak. “O kaöap, ne köpël. Nimtokëer ewat wëen.” Pël maan puuk epël ök yenëa. “Omën eporö pitëm kööre toköröa këlangönë öngpökaan waurö. Pitëm ulpëenöt Sëpsëp Ruupë itak iirak kölam wesaurö. 15 Pötaanök pit Anutu pim omp ak urta itëkëel taueë këtre rök poutë pim ngëengk tuptak pimëen inëen yaalmëem yaya maim wëaurö. Pël ëen Anutu pimënt pim omp ak urtak wel aisëë ngarangk yaalmëaup. 16 Pit kaalak këenëen ëere iten ë pël naëpan. Ēn këtëpökta nga elmëere omën nantë es nga naöök pitëk isö pël naëpan. 17 Sëpsëp Ruup omp ak urta luptak wëa pöpök pit ngarangk elmëak mës wak së i kölokta yoolëaurek së wëwë kosangta iit kol mangkën nëmpanat. Pël ëen Anutuuk pitëm ing telapöt tum mokorak won mowasëpanat.”

Sëpsëp Ruupök pepeweri wii téeëa 7 pö il olëa

8 1 Sëpsëp Ruupök kaalak pepeweri wii téeëa munt 7 pö il yoola. Pël ëen kutömweriaan ngön nent naën wieë akun kot nent ap aöa pöta ök won yes. 2 Pël ëen ne itaangkën ensel 7 ëak Anutuu ëöetak taueë kuup 7 tapël ëak yeön itenaut. 3 Pël ëen ensel munt namp wais Anutuun ur kiri yaalmëauta naë taö yeö. Pöp pi söwar koolötök ket ëa neweri omën nant köp nga kamp ompyaut wiipënëak wak wais taö yeö. Pël ëen pi omën es koulöp köp nga kamp ëëpna pöt kësang panë mangkën yeö. Omën köp nga kamp pöt Anutuun kiri yaalmëaurek ur koolötök ket ëa pötak kiri ar ëen es koulöp köp nga kamp ompyaut ngaarëk yawisem Anutuu omnaröa pimëen yayaare kimang yamëëa pötring erën ëëpënëak mangkën yeö. 4 Pël ëen ensel Anutuu ëöetak taueëa pöp pi omën köp nga kamp pöt moresi wak wë ar ëen es koulöpö ngaarëk yawisem Anutuu omnaröa pimëen yayaare kimang yamëëa pötring erën ëak yawis. 5 Pël yaëen enselëp pi söwar pöwer omën köp nga kampöt wiaan wak Anutuun ur kiri yaalmëautakaan es newes korak söwarweri wiak yangerak yoola. Pël ëen kent tangar mënak tangre kaö kësang yeraan moup yamö.

Ensel 4 ëak kuup mëna

6 Ne pöt itenak kaalak itaangkën ensel 7 pörö pitëm kuup 7 ëak wak wëa pöt mëmpënëak yaë.

7 Ensel wet kaal rëa nampök pim kuupö wet rëak mëngkën kopi kësangpel ëp ulöpötring yepelën esre omën iitring ngentiak yang lup ner pour es kot won yes. Ēn yang lup neraar om wia. Lup es kota pörek omnant wieëa pöt wiire këraare nön pout es kot won panë yes.

8 Ēn ensel 2 pöpök pim kuupö yamëngk. Pël ëen tomönötë ök nempel es yokotön olaan i kaöök yengenti. Pël ëen i kaö ë naö kaip tiin omën i sëen naöörar om wieëa. 9 I kaö ë omën i sa pöök animaö wëa pörö pourö wel wiin wangat pout utpet yaë.

10 Ēn ensel 3 pöpök pim kuupö yamëngk. Pël ëen ari naö es kalaö newesi yokot pipël pan kotak kutömweriaan ti yangerak yengenti. Pël

yaëen iitre i rëepöt pout kom äak 3 yes. Pël ëen ari pöök ngentiak yang nera iit ngep ëen munteraarëet om wieëa. ¹¹Ari ti ngentia pöökë yapinte welakre kakam pël ya. Pötaanök i we naöökël wieëa pöt welakre kakam sëen we naöörarë wieëaut om ompyaö wieëa. Pël ëen omën narö kësang i welak yaaö pöt nak wel yawi.

¹²Pël yaëen ensel 4 pöpök pim kuupö yamëngkën këtëp kom äak rongan 3 yesën ngoonöpre ariatta tapël yaë. Pël ëen këtëre ngoonre ari rongan 3 pötëaan nent mëngkën lup nent ëwa naën nenteparökëër ëwa yaë. Pël ëen këtëkre rö kanötë lup nentak ëwa naën wiaan lup nenteparökëër ëwa yaë.

¹³Pël ëen ne itaangkën int tup kësang panë nemor wal äak mopöök yesën kat wiaan int pöpök ngön äak epël ya. “O yaköm, yaköm, yaköm pan. Ensel munt 3 pöröak pitëm kuupöt mëmpna pötak yangerakë omnaröa naë utpet kësang panë nempelëar nempel äak orööpnaan yaë. Yang omnarö tol ëëpën?”

Ensel 5 pöpök kuup mëna

9 ¹Ensel 5 pöpök kuup mëngkën ne itaangkën ari naö kutömweriaan tiak wais yangerak ngentiak wieëa. Ari pö ensel nampönök ya. Ēn ne itaangkën yang öngöp wali panë naö wieëa. Pöökë leng ëa pörekën ne köpël. Yang öngöp pöökë kiet ensel pöp mangkën yeö. ²Pël äak puuk öngöp pöökë kanwer të wiin es koulöp naö öngöpöökaan oröak yawis. Es koulöp pö es kësangöte koulöpöökë ökö. Pël ëen es koulöp pöök këtëpre mop epö ka wariin koö yoola. ³Pël ëen es koulöpöökaan mop narö oröak yangerak yeira. Pöröa kant yamëngka nga pöt körngapöröa yaë pöl yaaurö. ⁴Pël ëen kutömweri wëauröak pitën epël ök yema. “Ar nönre këra, wiire omnant ke nampre nampöt e yangerak oröak wë epot pout utpet wasnganok om mait elmëen. Ēn omën Anutuun yaö äak pitëm ë kosatë pim yapinte nawiin piporöakëër utpet mowasën. ⁵Ar ngoon 5 pöröa öngpök omën piporö utpet moweseim ön. Pël ëënëetak mën wel mowiinganok.” Pël yemaan mop pörö omën narö kant mënak këlangön yemongawis. Pöt körngap nampë omën namp kant momkëna këem kat yawi pita ök yeëa. ⁶Ne omën pipot poutön itenaup. Pipot ngoon 5 pöröa öngpök orööpna pötak wel wiipna kanten ap kësang panë wasëpnaatak pangk kangk nokoirpan. Pit wel wiipën kön wiak pël ëëpnaatak pangk pël naëpan.

⁷Ne itaangkën mop pörö pol osöröa ngaöök sëpënëak kopëta wes ulmëen wë pöl äak wë. Mop pöröa kepönötë omp ak ul koolötök ket ëautë ököt waëak wëa. Këere wot kan pöt omnaröa ökörö. ⁸Ēn pitëm kepön ëpöt, öngöröaatë ök wali panëet oröëëa. Kë pöt kent nga laionöröaatë ök panëet oröak wëa. ⁹Pitëm ripatë aini ngilöatë ököt ngep ëëëa. Ēn wer pöt pol osöröa teënt ngaöök sëpënëak kaaratë nga ë raare wisangöt wa wiin wak weruak yesën u

késang ya pöl ya. ¹⁰Pitëm suut körngap pöröaatë ököt. Wap nantta omnarö wesirën kēem kat wiipnaat suutë oröëëa. Pitëm nga ëëpna pöt suutë wëa pötök omnarö ngoon 5 pöröa öngpök utpet yemowas. ¹¹Pit pouröa kepönöök omën omp ak namp wëa. Omp ak pöp ensel yang öngöp wali panëöökë ngarangk wëa pöp. Pim yapinte Yuta ngöntak Apaton, Krik ngöntak Apolion, ën tiarim ngöntak, “Omën omnant pout utpet yewesauap,” pël apenaap.

¹²Këlangön késang wet kaalte, kuup 5 pöökë mëngkën oröa pöt peene pet yair. Këlangön munt nentepar om wia, ënëmak orööpnaatepar.

Ensel 6 pöpök kuup mëna

¹³Ensel 6 pöpök kuup mëngkën ne kat wiin ngön nent yeem ya. Ngön pöt ur Anutuun kiri yaalmëaö koolötök ket ëa pim itëkëël wieëa pöta tepön 4 pötëëlaan oröak ¹⁴ensel 6 kuupö wak wëa pöpön epël ök yema. “Ensel utpet 4 ëak i késang Yupretis pël yema pömeri pouuk wii kaatak wë piporö kan wes mëen sëp,” pël yema. ¹⁵Pël yemaan ensel 4 pörö kama wël ë yemoulmë. Ensel utpet pörö, yangerakë omën pourö kom ëak rongan 3 wesak nentakörö mën wel mowiin nenteparëëro om öpnaat pël maan pitök ya pöt mëmpënëak kor wakaima. Pitëm pël ëëpna pöt ngaantakëër krismakiire ngoon, këtre aöa akun pöt mowia. ¹⁶Pit pël ëëpënëak kan yesën pitëm nga omën pol osöröa rangk wel aisëak wëa pörö pitring yes. Pitëm sareet pöt késang pan, 200 milion pël aan kat yawi. ¹⁷En pol osöröere pitëm rangk omën wëa pöröen wangartak epël itenaut. Omnaröa ripatë aini ngilöat ngep ëëëa. En pötë retëngretëng ëëëëa pöt epot. Köp möaare kunöm ka uraare kop retëng ka ura pöt pitëk pangk ëëëa. Pol osöröa kepönöt kent laionöröa kepönötë ök seëa. Pël ëën pitëm këmötëaan kël kop retëng ka ura es yokota nantring koulöpre wëlëngöt yaaröa. ¹⁸Pël ëën pitëm këmötëaan kël kop retëng ka ura es yokota pötring koulöpre wëlëngöt yaaröa 3 pötök yang omnaröa naëaan rongan nentak wëa pörö pourö mën wel yawiin nenteparë wëaurö om wë. ¹⁹Pol os pöröa weëre kosang pöt këm kanre suutë wieëa. Pitëm suut pöt kamalöröa ököt, kepönötta wëa. Su pötökta omnarö möak utpet wasëpnaat.

²⁰Pol osöröa këmötëaan omën utpet 3 ëak oröa pötök yangerak omën rongan nentak wëa pörö mën wel wiipënëak nentepar pël naalmëen yaë. Pël yaëën omën wel nawiin pörö lup kaip tiak utpet yaaut sëp newasën yaë. Pël ëak pitëm omp ak kaar aini koolre siluwaare parasötök ket ëëre këraare këlötök omën kön ket ëaut sëp newasën yaë. Omën kön pöt itaampööre kat wiire kan ing ë pël naën yaëëtak pötëën yaya yamëëa pöt sëp newasën yaë. ²¹Pël yeem nga ëëre kemp ë, wëwë utpet öngre omp nga ëëre omën köntak këkain ë pël yaaö pötta sëp newasën yaë.

Enselöpök Son pep newer mangkën na

10 ¹Ne omën pöt yaaröön itenak kaalak itaangkën kutömweriaan ensel weëre kosangring munt namp yeira. Pöp pim koröpöök

kepilōt pe ēēn keponōōk iere kasirō wesirak wēa. Kēere wot kante pōt kēt ket ēak mēak ēwa ēēēa. Ēn ingesiar pōt es wēlēngōōkē ōkōp. ²Pi pep kot newer wilak wali wēēa. Pim ing yaapkēēwes i kaōōkē rangk mēsēak katnēēwes yangerak mēsēak wēa. ³Pēl ēēēaupōk kent laionōpē ya pōl maap ngōn ē olēak aan tangre kaō akun 7 ēak yera. ⁴Pēl yaēēn ne ngōn pōt retēng ēēmēak yeem kat wiin kutōmwēriaan ngōn nent epēl yenēa. “Tangre kaō akun 7 ēak yeraan ngōn aan kat wian pōt ni retēng ēēnganēp kōnōōk wa wi,” pēl yenēa.

⁵Pēl yeneaan ensel nem wet rēak itaangkēn pim ingesiar nas i kaōōkre nas yangerak pēl ēak wēēn nem itena pōpōk kaalak o kutōmwēriil pim mor yaapkēēwes ngaarēk wesak wē ⁶Anutu wakaim ōpnaapōk, kutōmre yang, i kaōre omnant pōtē wieēa pōt pout ket ēa pōpē yapintak ngōn kosang wesak epēl ya. “Anutu pi omnarōaan kor wakaimaup, kaalak naōpanēp. ⁷Ensel 7 pōpōk pim kuupō mēngkēn Anutuu ngōn ēlēp ngaanēer pim inēēn ru tektek ngōn yaurōen ōk mēēa pōt kē orōōpnaat.”

⁸Pēl yaan ngōn nem wet rēak kutōmwēriaan ōk neaan kat wian taptak kaalak epēl yenēa. “Ni sē ensel i kaōōkre yangera rangk taueēa pōpē pep wilak wali wak ōpna pōwē kama ōm.” ⁹Pēl neaan ne enselēpē naē sē pep kot pōwē nampēnēak maan pi epēl yenēa. “Ni pōt num. Nim kēmtak kapulak kant mēnak numē pōt ngētōtē ōk misēng pan ēēpnaat. Pēl ēēpnaatak yaatak sē wieē welakre kakam ēak nga ēēpnaat.” ¹⁰Pēl neaan ne pep kot pōwē pim moresiaan wak naut. Pēl ēēn nem kēmtak kapulak nēēn ngētōtē yaē pōl misēng pan ēaut. Ēn yaatak sē wieēak kaalak welakre kakam ēak nga ēaut. ¹¹Pēl ēēn ne epēl kat yawi. “Ni kaalak omēn yang kaō nantē neenem ngōnōt yaaōre pitēm omēn omp akōrōa naē orōōpna pōt tekeri wesak maim ōm.”

Omēn naarōk Anutuu ngōnte ōk apnaat

11 ¹Ne ngōn pōt kat wiaan nampōk sungkōr ōk naō nenak epēl ōk yenēa. “Ni wal ēak ōk epō wak sē Anutuu ngōnēn tup kaōetere ur pimēēn kiri yaalmēautak epōōring ōk wiak omēn pōrek piin yaya yamēēa pōrōen sangk kelum. ²Pēl ēēmēetak tup ka ngēēngkta ēm pipō ōk wiinganēp, mosēp. Pipōōkē ōngpōk Anutuuk omēn ngōnēn kōpēlōrōaan yaō maan pit Yerusalem ka ngēēngk pipō krismaki nentepar nent ngoon 6 pōrōa ōngpōk ka pō utpet wasēpnaat. Pōtaanōk ōk wiingan. ³Pēl ēēn omēn naar nem songōnte tekeri wasēpnaan wes mēēmaat. Ne piarip wes mēēn nem ngōnte tekeri wesak apnaataan kaplak ilaim wēēn krismaki nentepar nent ngoon 6 pōrō pet irēpnaat.”

⁴Omēn pōaar kēra olip rikōtre rampeetē rangina yaē pōl yangera pepap, Akōp, pim ēōetak ēwa yaauwaar. ⁵Omēn namp piarip utpet mowasēpēn wesak elmēēpna pōt es wēlēngōōrar piarpim kēmtēparēaan orōak mokotōpnaat. Yaap, omēn piarip utpet mowasēpna pōrō akun

tapëtakëer wel wiipnaarö. ⁶Piarip kutömweriaan weëre kosang wak akun piarpim Anutuu ngönte aö sëpna pötë piaripök kopi nepelën ëëpënëak maan nepelën ëëpnaat. Weëre kosang tapööring i epot pout kaip tiak omën i sëere yangerak omnant këere ngaat orö pël ëëpënëak maan pël ëëpnaat. Piaripök ya pöt mëmpënëak kön wiipna pöt pangk ëëpnaat.

⁷Piarpim Anutuu ngönte ök aö seimeë së pet irëpna pötak animaö utpet nga namp yang öngöp wali panë pöökaan oröak piaripring nga elak puuk piarip mën wel mowiipnaawaar. ⁸Pël ëën omën pöaarë sokuraar ka kësang piarpim Aköp këra yetaprak möön wel wia pöökë kamtaöök mowiin wiaapnaat. Ngön nokoliitak ka pöön Sotomre Isëp pël ya. ⁹Pël ëën omën möönre koröp naöre naö, ngön nerere ner, yang poutëaan narö wais erën ëak piarpim sokuraarön iteneimeë së kët 3re ën kët kaö nent pël sëpnaat. Pël ëëpnaatak omën nampökta itenak wak së welaaröa yangaöök moweerëpnaaten kuure mak nemaan ëëpnaat. ¹⁰Pël ëak yangerakë omën pourö piarpim wel wia pötaan yak ërëpërëp ëak këere kaömp ngawi nak nener omnant yowe mampnaat. Pöt yangerakë omën pörö utpet yaëën Anutuu tektek ngön yaaö omën pöaarök pit këemre këlangön menak utpet moweseima pötaanök.

¹¹Ën kët 3re kaö nent won sëën Anutuuk pim omën wel wia pöaar wëwëeta ëmö mangkën kaalak öp sak tauaan omën pourö piaripön itenak kas kësang pan yaë. ¹²Pël ëën piarip kat wiaan kutömweriaan ngön naö ngön ëak epël yema. “Arip e ngaarëkël apreë.” Pël maan piarip kan aprö is kutöm kepilötë öngpök ilëak yesën kööre tokörö itenaut. ¹³Pël ëën akun tapëtakëer moup nempel möak ka kaöaöökë lup ner utpet wes yoolaan lup 9 ëak om wia. Moup yamöön omën 7,000 ka kaöaöökë lup nerak wëaurö wel wiin, lup 9 pötë wëaurö om wë omën pörek oröa pöten itenak kas kësang panë yeem Anutu kutöm pepapë yapinte wak isak yema.

¹⁴Këlangön kësang 2 kuup 6 pöökë mëngkën oröa pöt peene pet yair. Këlangön 3 ënem panë pöt, peene tapët orööpnaan yaë.

Ensel 7 pöpök pim kuupö mëna

¹⁵Ensel 7 pöpök pim kuupö mëngkën kutömweriaan omën naröak ngön ë olëak epël ya. “Tiarim Aköp Anutu pi Kristo pim Yaö Mëëaupring omnaröa kaö sak wë om wakaim öpnaap.” ¹⁶Pël yaan ngarangk 24 Anutuu ëöetak pitëm omp ak urötë wel aisëëëa pörö pit rar rë mowesirak tok oriak Anutuun yaya yamëem ¹⁷epël yema.

“O Aköp Anutu, weëre kosang pout wieëaup,
ni ngaanëer wakaimaupök peeneeta wëën.

Ni nimtë weëre kosang kësangö wak omp ak sak ngarangk yaalniin.
Pötaanök ten niin yoöre ërëp yeniak.

¹⁸Yangerakë omën niin köpëlörö ya sangën elnieim wë,

ën nim pitēmēen ya sangën elmēmē pöt yok peene yaarö.
 Nim omën wel wiauröa wël äak kangut mampë pöteta yok yaarö.
 Peene nim inēen ru tektek ngön yaaö omën pöröere ën nim omën
 pourö, kotre kaö,
 niin kasinkasin yaalnia pörö pit ompyaö kangut mampëp.
 Pël äak omën yang omnarö utpet yewesauröeta utpet mowasumëp.”

¹⁹Pit ngön pöt ök më pet yairën Anutuu tup ngëengki kaöet kutömweri
 wia pöt kan tēen ne itaangkën Anutu pim umkek Mosesë ngön kosangöt
 wieëa pöt tup pöta kakaati wia. Pël ëen ne itenaan kent tangar mēnak
 tangre kaö rëak moup möak kopi kēsangpel ëp ulöpötring yepel.

Öng nampre kamal kēsangöpë ngönte

12 ¹Ne itaangkën kutömweri retëng kēsang nent yaarö. Pöt öng nampök
 pim koröpöök këtëpök ulpëen ket äak mëak wëa. Ngoonöp pöt pim
 ingesiarë iri wëa. Ēn kepönöök pöt ari 12 pötök ul ket äak waëak wëa. ²Pöp
 ru yak wë wilëpënëak lel yailën këlangön kēsang kat yawiem merek ya. ³Ēn
 omën munt nantta kutömweri taprek yaarö. Omën pöt kamal kēsang panë
 nemorë ök sak wëa. Pömor köp möaumorök pim kepönöt 7 äak wëen watöt
 10 äak pötëaan oröëëa. Ēn omën omp aköpë ulöt 7 äak pim kepön 7 pötë
 waëëëa. ⁴Pim su pömentök kutömweri möak ari tit nent ti olaan tit nentepar
 pëen om wë. Pël äaan kamal pöp öng ru wilëpënëak yaaö pöpë itëkëäl sē
 nga kor taö yeö. Öng pöp rungaap wilën pi wa nēmpënëak pël yaë. ⁵Pël ëen
 öng pöpë yokot ënëmak yangerakë omën pourö weëre kosangring ngarangki
 elmëëpna pöp yawil. Pël ëen akun tapëtakëer pit rungaap teëntom panë wak
 yes, Anutu pim omp ak urtak wel aisëëëa pöpë ngësë. ⁶Pël ëen öng pöp kan
 kas sē yang lup omën won ner, Anutuuk mangkën krismaki nentepar nent
 ngoon 6 äak wëen ngarangki äak kaömpre omnant mampënëak yema.

⁷Ne kaalak itaangkën kutömweri nga kēsang panë nempel yaarö. Nga pöt
 Maikelre pim enselöröak kamal kēsang pömorre enselöröaan nga yaalmë. Pël
 yaëen pit kangiir yaalmë. ⁸Pël yaëen Maikelre pim enselöröak pit il mowesak,
 “Ar e kutömweri yok pangk naöngan,” pël yema. ⁹Pël mëak kamal pömor wa
 yangerak yemoola. Pöp kamal wet ngaanëer pan wakaimaupök yangerakë
 omën pourö morök yaalmëaup, Seten pöp. Piire pim enselörö wa yemoola.

¹⁰Ēn ne kat wiin kutömweriaan ngön naö ngön ë olëak epël ya.

“Peene Anutuuk tiar utpetetakaan kama yanu.

Peene pim weëre kosangöök omnant pout il mowesak pi Aköp pël
 sak wë pöt pet yaalni.

Ēn pim Ruup Kristo puukta pi kaö sak wë pöt pet yaalni. Pöta
 songönte epët.

Seten pi tiarim Anutu pim ëöetak tiarim karuröaan röökre kët
 poutë ngön utpet wesak yamëëa pöp piaripök kutömweriaan wa
 yemoola.

11 Tiarim karurö Yesu Kristo, Sëpsëp Ruupë i il olëa pötak weëre kosang wak pim ngönte ök aimeë Seten il mowesa.

Pit pitëm wëwëat keimön naën Anutuu ngönte taë wes wak wëen pitëm kööre toköröak mënaurö.

12 Pötaanök kutömweri wëaurö ar ërëpërëp ëëë.

Ēn yangerakre i kaöök wëauröaan yaköm pan.

Seten pi pim akunet ëwat wë yak ya sangën ëen arim naë oröak nga kaö elniipnaan yaë.”

13 Kamal kësang pöp pi yangerak wa moolëa pöten kön wieë öng yokotup wila pöp utpet mowasëpënëak nga yes. 14 Pël yaëen Anutuuk öng pöp int tup wereweriarë ök neweriar yemangk. Pöt pi kamalöpë näëaan kas wal ëak yang lup omën won panë nerek së wëen Anutu ngarangk elmëak këere kaömp meneim wëen krismaki 3 ën ngoon 6 pël sëpënëak yemangk. 15 Pël ëen kamal pöpök öng pöp i wak sëpën pël kön wiak köm ngës olaan i kësang nemer nga urak ënëm yes. 16 Pël ëen yangerak öng pöp kaamök elmëak këm nga ëen i kamalöpë köm ngës olëa pömer ngemë ilëak won yes. 17 Pël ëen kamal kësangëp pi öngöpön ya sangën ëen pim ru wet rëak wilaö muntarö Anutuu ngön kosangöt ngaarëk wëere Yesu pim omnant tekeri wes mena pöt taë wes wak wëaurö nga elmëëpënëak yes. 18 Pël ëak kamal kësang pöp i kaöökë pisöök tauak kor wë.

Animaö nga naar oröa

13 1 Ne omën pötön itanaan animaö nga namp i kaöökaan yaarö. Pöp pim kepönöt 7 ëak wëen watöt 10 ëak pötëaan oröëëa. Omën omp ak ulöt 10 tapël ëak wat 10 pötë waëak wëa. Pim kepönötë yapin Anutuun utpet wesak yaaö nant wieëa. 2 Animaö nga nem itena pöp pi pusi kësang nga namp lepat pël ya pöpë ököp. Ingesiar pöt imën nga namp pea pël ya pöpë ök. Ēn këm pöt kent nga laionöpë ök. Animaö nga pöp kamal kësangëpök pim weëre kosangö menak pim omp ak urtak wel aisëëë yangerakë omnarö ngarangk ëëpënëak yema. 3 Pël yaëen ne itaangkën animaö nga pöpë kepön naö omnaröak wisang ëak mënaupë kepönöökë ök seëa. Pël ëautak ëmpölö yok pu wariin yaap sak wëen omën pourö pöten itenak yaan sak ëak pim ënëm yes. 4 Pël ëak omnarö kamal kësang pöpök pim weëre kosangö animaö ngaap mena pötaan kamalöpön yaya mëak animaö ngaapönta yaya mëak epël ya. “Talëp animaö ngaapë ök weëre kosangring wë? Ma talëpök pi il mowasëpën? Won pan.”

5 Kamal kësangëpök animaö nga pöpön, “Ni Anutuu yapinte wa ngep elmëak utpet wesak mam,” pël ök maan Anutu kuure mak yema. Pël ëak pi krismaki 3 ën ngoon 6 pöröa öngpök yang omnarö ngarangk elmëëpënëak animaö ngaapön tapël yema. 6 Pël maan pi Anutuun

utpet wesak mēak yapinte wa ngep elmēak pim wēautere kutōmweri wēaurōenta utpet wesak yema. ⁷Pēl ēak animaō nga pōpōn Anutuuk pim omnarōen kōōre tok elmēak puuk il mowesak omēn mōōnre korōp naōre naō, ngōn nerere ner, yang poutēērō ngarangk elmēēpēnēak kuure mak yema. ⁸Pēl maan yangerakē omēn pitēm yapinōt wēwē kosangta pepeweri retēng naēn ēa pōrōak animaō nga pōpōn yaya yema. Pep pōwer yang epēr naarōōn wiaan Sēpsēp Ru ēnēmak mēn wel wia pōpōk omēn wēwē kosangtak ōpnaarōa yapinōt retēng ēauwer.

⁹Katringōrōak ngōn epēt kēēkē kat wiin. ¹⁰Anutuuk omēn namp wii kaatakēn yaō ēēpna pōp yok sēpnaap. Ēn nampōn kōōre tokōrōak mēmpēnēak yaō ēēpna pōp mēmpnaap. Ngōn pōt ngōnēntak wia. Pōtaanōk omēn ke pilōt Anutuu omnarōa naē yaarōōn pōt kosang sak wē piin kōn wi kosang yewesaut taē wes wak ōp.

¹¹Ne kaalak itaangkēn animaō nga munt namp yangera ōngpōkaan yaarō. Pōp wat naōōrar wēa pōōrar sēpsēp ruurōaatē ōk. Ēn pim ngōnaak yaaō pōt kamal kēsangōrōa ngōnōtē ōk kaō yaaup. ¹²Animaō nga 2 pōpōk munt wet kaal pōpē wēēre kosang pout wak wēa. Pēl ēak pi wet kaal pōp kaamōk ēak yangerakē omēn pourō animaō wet kaal pim kepōn naō mēngkēn wel wiin ēmpōlō pu wariaō pōpōn yaya mapēnēak yamēēaup. ¹³Animaō nga 2 pōpōk ya it ngōlōp ke nentere nent mēneim wē. Pēl yeem kutōmweriaan esuwes wes mēēn yangerakēl yeiraan omnarō iteneim wē. ¹⁴Pēl ēēn Anutuu kuure mak mēēaul animaō nga wet kaalēpē itōōk ya it ngolōpōt yamēngka pōtōk yang omnarōen morōk epēl maim wē. “Ar animaō nga ngaantak ōp wesirēn wel wiak kaalak ōp wēaupē kōnōp ket ēak kōn pōpōn yaya maim ōn.” ¹⁵Pēl yaēēn Anutuuk kat mowiin puuk animaō kōn ket ēa pōp wak kēm muntōn momōōn ngōnaak yaan omēn animaō kōn pōpōn yaya nemaan yaē pōrō mēneim wē. ¹⁶Pēl ēak animaō nga 2 pōpōk omēn pourō kotre kaō, monere urōmaringre il ngentingenti yaaō, omēn yaap wēaōre ēn inēēn yaaō pourōen maan animaō wet kaalēpē yapinte pitēm mor yaapkēētēere ē kosatē wi pet yair. ¹⁷Namp animaō pōpē yapintere saareet piik nawiin ēēn pōt animaō pōpōk omēn pōp omnant sum ēēre omnarōakta pim naēaan sum ē pēl naēpan pēl yema.

¹⁸Animaō nga pōpē yapinta songōn pōt epēl kēēkē kōn wiipa. Yapin pōt saareet 666 pēl wia. Pōtaanōk omēn namp kōn wetete wē pōt saare epēt sangk kelak pōta songōnte ēwat sēp.

Omēn 144,000 pōrō tan ngolōp nent ēa

14 ¹Ne kaalak itaangkēn Sēpsēp Ruup Yerusalem kak Saion rosiraōōk taueēa. Pēl ēēn omēn 144,000 Sēpsēp Ruupre Pēpap Anutu piarpim yapintepar pitēm ē kosatē wieēa pōrōeta piiring wēa. ²Pēl ēēn ne kat wiin kēm ngōn nempel i kēsang nant nga yaurem kuk aōre

tangre kaö kësang rë pël yaë pöta ök kutömwëriaan yaarö. Ngön nem kat wian pöt omën selap intö tang yamööna ya pöl äaut. ³Omën 144,000 pörö Anutu pim omp ak urtak wel aiseëa pöpre kutöm omën mor kong nent wëwëetaring pöröere ngarangk 24 pöröa ëöetak tauëë tan ngolöp nent aim wë. Tan ngolöp pöt omën muntaröak ëwat nasëpan. Omën 144,000 Anutuuk yang omnaröa naëaan pimëën kama wa pöröakëër pangk ëwat sëpnaat. ⁴Omën pörö pit öngörö mësël naën wonörö. Pit yaap wëwë wotpil wakaima. Pël ëëë Sëpsëp Ruupë ngönte ngaarëk wak kaatë ya mëmpö seima. Omën pörö Anutuuk pöta kangiir pit yang omnaröa teköokaan kama waurö. Pël ëën Anutüre Sëpsëp Ruupë ingre moröröa wotöökörö pël sak wëa. ⁵Pit ngön kaar aöre utpet nent ë pël naën, won.

Ensel 3 pöröak ngön nant ök mëä

⁶Ne kaalak itaangkën ensel munt namp mopöök wal ëak yesën itenaut. Pöp möönre koröp naöre naö, ngön nerere ner, yang poutëëroën Anutuu ngön ompyaö wiakaim wiaapna pöt ök mapënëak yes. ⁷Pël ëak pi ngön ë olëak epël ya. “Anutu pim omën pourö kom ëak ngön yaatak niulëëpna akunet yok yaarö. Pötaanök piin kas yeem ping wesak maë. Pi kutömre yangre i kaöre kölok pout ket ëa pöpön yaya maë.”

⁸Pël aö yesën ensel munt namp pim ënëm yesem epël ya. “Kat wieë. Papilon ka kaöaö omën naröak yok utpet yewas. Yaap, pit utpet panë wesak tööl yoola. Omën ka pöök wëa pörö öng omp nga yaaö nampë wain iit omnarö mangkën nak piiring utpet yaë pol pitëm utpet yaaö pöt yang omën pouröen rë moulön ulöl sa. Pötaanök pitëm ka kaöaö töölön pitta kö yes.”

⁹Pël aö yesën ensel munt 3 pöp wet kaal pöaarë ënëm yesem ngön ëak epël ya. “Omën narö animaö nga pöpre pim omën kön ket ëaupön yaya mëak pim yapinte pitëm moresiire ë kosaöök wiaapëna pörö ¹⁰omën nampë wain iit mangkën nak kön irikor yaë pöl Anutuuk pitën ya sangën elmëën këlangön kat wiipnaarö. Kot nent wiap naalmëëpan, ya sangën kaö elmëak kël kop retëng ka urauuk es yokota pörök wes mëën ensel ngëëngköröere Sëpsëp Ruupë ëöetak këlangön kaö pan kat wiipnaarö. ¹¹Es pitëm këlangön kat mowiiipna pöwes nariin om yokotön koulöpö ket ëlötë o ngaarëk aprö seim öpnaat. Omën animaö ngaapre pim omën kön ket ëaupönta yaya yamëem pim yapinte pitëk wiaapna pörö röökre ket poutë këlangön kat wieim öpnaarö.”

¹²Pël ëëpnaat pötaanök utpet ke nentere nent Anutuu omën pim ngön kosangöt ngaarëk wëere Yesuun kön wi kosang wasö pël eim wëaurö arim naë yaaröön pöt kosang sak ön.

¹³Ne kaalak kat wiin ngön nent kutömwëriaan epël yenëa. “Ni ngön epël retëng ë. Omën Aköpë naë rë olëak wë akun eptak ngës rëak wel wiipna pörö ërëpërëp ëëpnaarö.” Pël yaan Ngëëngk Pulöök epël

yenëa. “Yaap pan. Pit wel wiin pitëm ya mëmpnaatë kangut Anutuuk mampnaarö. Pötaanök yok pangk pitëm ya kaö mëmpna pöt pet irak kë yesem ërëpërëp eim öpnaarö.”

Enselöröa omnarö koirëpnaata ngönte

¹⁴Ne ngön pöt kat wiak kutömweriil itaangkën kutöm kepil kölam kësang ner wiaan itenaut. Pël ëën kepil pöra rangk namp wel aisëëea. Pöp omnaröa ököp, pim kepönöök omp ak ul koolötök ket ëa nent waëak moresi öp nga panë newer wak wëa. ¹⁵Pël ëën ensel munt nampök Anutuu ngëengk tup kaöeta kakaatiaan oröak ensel kutöm kepilta rangk wel aisëëea pöpön maap ngön ëak epël yema. “Yangerakë kaömpöt köp sëën tiak kama ömë akunet yok yaarö. Pötaanök ni së öpwerring ti.” ¹⁶Pël maan ensel kutöm kepilta rangk wel aisëëea pöp së pim öpwer yangerak wesirak kaömp köp saut yati.

¹⁷Pël yaëën ne itaangkën ensel munt namp kutömweri ngëengk tup kaöeta kakaatiaan öp nga panë newer wali wak yaarö. ¹⁸Pël ëën ensel munt Anutuun kiri ar yaaö urtak esuwesi ngarangk yaaupök pötakaan oröak ensel öp nga panëëwer wali wak wëa pöpön maap ngön ë olëak epël yema. “Yangerak wii wain ulöpörö köp sak wë. Pötaanök së öpwerring tö.” ¹⁹Pël maan ensel pöp së pim öpwerring yangerakaan wain ulöprö töak rongan yaë. Pël ëak wain ulöp pörö ing mësaan iit oröak sëpënëak wa kap kësang këlötök ket ëa nenta öngpök yewesir. Wain ulöpöröa ing mësaan iit oröak sëpna pöt Anutu pim omnaröen ya sangën elmëëpnaata ök ëëpnaat. ²⁰Pit Yerusalem kaöökë ka tomök wii wain ulöp pörö kap kësang pötak wesirak ing mësaan pötakaan omën iit oröak i yaapötë ök yaë. I pöt oröak kaö wetak omnaröa kepönöt il yewas. Rëëptakaan opetakë waliit 300 kilomita pöta ök.

Ensel 7 pöröak omën utpet panë nant 7 tapël ëak wali wak wëa

15 ¹Ne itaangkën kutömweri retëng kësang munt nent oröak wëën itenak yaan saut. Ne itaangkën ensel 7 pörö omën utpet panë nant 7 tapël ëak omnarö utpet mowasëpnaat wak wëa. Omën utpet pöt oröön ënëmak kaalak munt nant naaröön ëëpnaat. Anutu pim ya sangënte pörekök pet panë irëpnaat.

²Pël ëën ne omën kësang i kaöökë ök nenten itenaut. Omën pöt könitweri öktak esuwesi köp möak wë pöl ëëea. Ën omën animao nga pöpring nga elak piire pim omën kön ket ëaupre pim yapinta saareet il wesa pörö Anutuuk pim intöat mangkën wali wak i kaö könitweri ök pöökë ëöök taueea. ³Pël ëëë Sëpsëp Ruupëen tan nent Moses Anutuu inëen ruupë tan pöta ök epël aim wë.

“O Aköp Anutu, ni weëre kosang pout wieëaup.

Nim ya pout kosang kaö panëët, pölöpringöt.

O omēn pourōa Omp Aköp,
nim wēwē pōtakēēr wotpil ompyaō panēēt.

⁴ Aköp, nimēt tapōpōkēēr ngēēngk panēēp.

Pōtaanōk ten omēn pourō niin kasinkasin elniak nim yapinte wak
isak nianaat.

Nim wotpil yewesa yaat tekeri panē orōak wia.

Pōtaanōk yang kaō poutēaan narō nim naē wais yaya niapnaat.”

⁵ Tan pōt pet irēn ne kaalak itaangkēn kutōmweri ngēēngk tup kaōēt
poē korōpōtōk ōk rēa pōta kakaati ngēēngk tup panē pōt kan tē wieēa.

⁶ Pēl ēēn ensel 7 pōrō omēn nant omnarō utpet mowasēpnaat 7 tapēl ēak
wak tup ngēēngk panē pōta kakaatiaan yaarō. Pit ulpēēn wali ompyaō
kewil won, ēwaēwa yaaō nant mēak wēa. Pēl ēak yepat koolōtōk ket ēa
nant pitēm ripatē wirō rēwarōk rēak wēa. ⁷ Pēl ēēn kutōm omēn mor
kong nent wēwēetaring pōrōak sōwar koolōtōk ket ēa 7 ēak ensel 7 pōrō
yemangk. Sōwar pōtē Anutu wēwē kosangtaringēp pim ya sangēnōt peō
ēēa. ⁸ Ēn Anutuu ēwaare wēre kosang pō es koulōpōōkē ōk sak tup
ngēēngk panēētak wiaan es koulōp pō kakaati peō ēaan omnarō pōrek
ilapnaat pangk naēn. Ēnēmak utpet 7 enselōrōak wak yewais pōt pet
irēpna pōtakēēr ilapnaat.

Anutu pim omnarōaan ya sangēnōt sōwar 7 pōtē wieēa

16 ¹ Ne kat wiaan tup ngēēngk panēēta kakaatiaan ngōn nent ensel 7
porōen epēl ōk yamēem ya. “Ar sōwar 7 pōtē ōngpōk Anutuu ya
sangēnōt wia pipot kōmen yangerak olaē,” pēl yema.

² Pēl maan ensel kopēt pōpōk pim sōwarweri wieēaut wak sē kōmen
yangerak yoola. Pēl ēēn omēn animaō ngaapē yapinte pitēk wiak pim
omēn kōn ket ēaupōn yaya maima pōrōa naē ēmpōl utpet kēsang panē
nant orō morēēn kēlangōn kaō kat yawi.

³ Ēn ensel 2 pōpōk pim sōwarweri wieēaut i kaōōk kōmen yoola. Pēl
ēēn i kaō pō kaip tiin omēn wel wiaurōa iitē ōk korōp orōōn omēn i
kaōōk wēa pōrō wel wi won yes.

⁴ Pēl yaēēn ensel 3 pōpōk pim sōwarweri wieēaut i kēsangōtēēre
kolōkōtē kōmen yoola. Pēl ēēn pōtta kaip tiin omēn i korōp yaarō. ⁵ Pēl
ēēn ne kat wiaan ensel i pout ngarangk yaaō pōpōk Anutuun epēl yema.

“O Ngēēngkēp, ni wakaimaupōk wēēn.

Nim kangut yemengka yaat wotpil yamēngkaup.

⁶ Omnarōak tektek ngōn yaaō omēnere nim omēn muntarō mēn wel
wiin pitēm iit orōak ngentieimaut.

Pōtaanōk omēn utpet pōt eima pōrō nuuk omēn i epot mangkēn yen.

Nim wotpil yewesa yaat yamēngkēn pitēm utpetatē kangut yeō.”

⁷ Pēl yemaan ne kat wiaan kaalak ur Anutuun kiri yaalmēautakaan ngōn
nent ngōn ēak epēl ya.

“Yaap, Aköp Anutu weëre kosang pepap,
nim ya yamëngkaut wotpilre ompyaö yamëngkaup.”

⁸Ēn ensel 4 pöpök pim söwarweri wieëaut këtëpë rangk kömen yoola. Pël ëën Anutuuk këtëp nga panë wesak maan omnarö es kotöpënëak yema.

⁹Pël ëën këtëp nga panë wesak maan omnaröa koröpötë es mokotön Anutu utpet pöten maan pit utpet mowasëpënëak oröa pöpön utpet wesak yema. Pit lup kaip tiak piin ping wesak nemaan yaë.

¹⁰Ēn ensel 5 pöpök pim söwarweri wieëaut animaö ngaapë omp ak urtak kömen yoola. Pël ëën animaö pöpë ikanöök omën wëen ngarangk elmëeima pöröa naë koö yoola. Pël ëën omën pörö këmre këlangön kat yawiem kë kant mënak wë. ¹¹Pël ëak pitëm ëmpölre këmre këlangön yaaö pötëen Anutu kutömweri wëaupön utpet wesak yema. Pitëm utpet yaaut kasëng menak lup kaip natiin yaë.

¹²Ēn ensel 6 pöpök pim söwarweri wieëaut i kësang nemerën Yupretis pël yema pömeri kömen yoola. Pël ëën i pömer leep raan omën omp ak këtëpë yengampialul wëauröa wais nga elëpna kanö yaarö. ¹³Pël yaëen itenaan urmer ömöröa ök narö 3 ëak yaarö. Namp kamal kësangëpë këmtakaan, namp animaö ngaapë këmtakaan, namp animaö nga munt 2 pöpön tektek ngön yaaö kaar omnamp pël yema pöpë këmtakaan pël ëak yaarö. ¹⁴Urmer pörö Setenëëröak omën it ngölöp ke nentere nent yaaurö. Pit yang ël epotë omp aköröa ngësë yes. Pitök omën omp ak pörö Anutu weëre kosang pepapë akun kaöaöök nga elëpnaan wa rongan elmëëpënëak yes. ¹⁵⁻¹⁶Pël ëak së koirak yang lup nentak wa rongan yaalmë. Yang lup pöta yapinte Yuta ngöntak Amaketon pël ya.

Pël yaëetak Kristook epël ya. “Kat wieë. Ne këkain omnaröa yaë pöl ëlëëp waisumaap. Pötaanök namp pi ka uraan këkainëpök wais pim poë koröpö wilak sëen yool wë omnaröa ëöetak ëö ëëpanëen itit ngarangk ëëpna pöp ërëpërëp ëëpnaap.”

¹⁷Ēn ensel 7 pöpök pim söwarweri wieëaut mopöök kömen yoola. Pël yaëen tup ngëëngk panëetak omp ak urtakaan ngön kosang nent epël ya. “Nem omën utpet pipotring omnarö yamëngk pöt peene pet yair.” ¹⁸Pël yaan kent tangar mënak tangre kaö yeraan moup yamö. Moup pömpel kësang panëëmpel ngaan ke pël nent möön itnaangkën ëautak peenök yamö. ¹⁹Pël ëën Papilon ka kësang pö luptak weerak 3 wasën omnaröa kaat tööl ngentiak utpet yes. Pöt Anutuuk Papilon omnaröa utpet yaautön kön wiak omën nampë muntap wain i ngaat mangkën nak këlangön kat yawi pöl pitën ya sangën kaö elmëen utpet yes. ²⁰Yanger moup kësang yamöön i kaö kusöt mop wiak sëen rosiratta won yes. ²¹Pël ëën kutömweriaan kopi kësang yepelën ëp ulöp kësangöt omnaröa rangk ngentiin këlangön kaö kat yawi. Ēp ulöp kopët nemesi könömët omnaröa könömta ök. Pël ëën pötök utpet panë mowesa pötaanök omnaröak Anutuun utpet wesak yema.

Öng omp nga yaaup pi sum utpet wa

17 ¹Ne omēn pōten itenaan ensel 7 äak söwar nant 7 tapēl äak wali wak wēa pōrōakaan nampök wais neen epēl ök yenēa. “Ni wais. Pēl ēēn öng omp nga ē yaē pöp pim utpetatē kangut Anutuuk mangkēn öpnaatōn pet elnimaan. Öng pöp pi ka kaō i kēsangōtē ēōök wieēa pō. ²Yang omp akörō pit öng pöpring utpet yaurō. Ēn omēn yaapörōeta sēēn öng pöpök wain iit mangkēn nak kön irikor äak piiring utpet tapēl yaurō. Pōtaanök Anutuuk utpet kangut mampnaat.”

³Pēl neaan Ngēēngk Pulō pim weēre kosangōōring nem naē orōōn ensel pöpök ne mēsak sē yang lup omēn won nentak yeneulē. Pēl ēēn ne pōrek wē itaangkēn öng namp animaō nga köp möaō nampē rangk wel aisēēa. Animaō pöpē koröpōök yapin Anutuun utpet wesak yaaō nant kēsang retēng ēēa. Ēn pim kepōnōt 7 äak wēēn pōtē watōt 10 äak orōrēa. ⁴Öng pöp ulpēēn köp nentepar möa namp mēak polre kal äak ē rangi ompyaut pim koröpōök pangk äak wēa. Pēl äak kelōn koolōtök ket ēa nent wali weēa. Pōta öngpök pimtē omp nga yaauta utpet kamp yaaō kömkēēnringōt peō ēēa. ⁵Pēl äak pim yapin ēlēpēt ē kosaōök retēng ēēa. Pōt epēt. “Papilon ka kaōaō, öngre omp nga yaaōre utpet kömkēēnringōt yaaō pōtē ēl panēp.” ⁶Ne itaangkēn öng pöpök Anutuu omnarō mēnak pitēm iit nak kön irikor äak wē. Omēn pōrō Yesuu yapinte wak kaō wesak aima. Pōtaanök pit mēnak pitēm iit nak wē.

Ne öng pöpōn itenak yaan panē saut. ⁷Pēl yaēēn enselēpök epēl yenēa. “Ni orōpmorēēn yaan panē yesēn? Nook niin öng pipopre animaō kepōnōt 7 äak wēēn pōtē watōt 10 äak orōaupök öngöp köka äak wēa pöp piarpim songōntepar ök niamaan kat wi. ⁸Animaō nim itenaō pöp ngaantak wēaupök peene won wia epop ēnēmak kaalak yang öngöp wali panē pōōkaan orōak apēr sasa kö sēpnaap. Pēl ēēn omēn yangerak öpna pōrōa yapinōt wēwē kosangta pepeweri yang epēr naarōōn wiaan retēng naēn ēa pōrōak animaō pöpōn itenak yaan sēpnaat. Animaō pöp ngaantak wakaimaupök peene won wia ēnēmak orōōpnaap.

⁹“Pōta songōnte kēēkē ēwat sēpa. Pōt epēt. Kepōn 7 äak wēa pēl ya pipot rosir 7 pōtōnōk ya. Öng pöp rosir 7 pōtē rangk wel aisēēaup. ¹⁰Ēn kepōn 7 äak wēa pēl ya tapōtök omēn omp ak 7 pōrō pēl ya. Pitēm naēaan 5 pōrō wel wiin kopēt nampökēēr peene yangerakē omp ak sak om wē. Ēn munt namp pi omp ak nasēn won wē. Ēnēmak pöp orōak akun kot panē nent öpnaap. ¹¹Animaō nga pöp ngaanēēr wakaimaupök peene won wia, pöp piita omp ak namp munt 7 pōrōak erēn ēēn 8 äak wē kö sēpnaap.

¹²“Ēn watōt 10 äak nim itenaō pōt omēn omp ak 10 pōrōenök ya. Pōrō pit peene omp ak nasēn wē. Akun kot panē 1 aōa ke pil pōtak weēre kosang wak animaō nga pöpring omēn omp sak öpēnaarō. ¹³Pēl äak

omën omp ak 10 pörö pit kön kopët nent wieë pitëm weëre kosangre omnaröen ngarangk elmëepna pöt animaö nga pöp kön wes mampnaat. 14Pël äak pit Sëpsëp Ruupring nga elak pöpök pit il mowasëpnaarö. Pi omën isaö pouröa Kaöap, omën omp ak pouröa Omp Aköp. Pötaanök omën piiring öpna pörö, pim yas mëak pimtëen yaö ëen pim ngönte këëkë wesak öpna pörö pourö, piiring erën äak yang omp ak pöröaring nga elak il mowasëpnaarö.”

15Pël neak kaalak epël ök yenëa. “I kësangöt öng omp nga yaaupë ëöök wel aisëëa pöt omën möönre koröp naöre naö, ngön nerere ner, yang poutëeröenök ya. 16Ēn watöt 10 äak oröaan nim itenan pipot yang omp ak 10 äak nem ök niaö pöröere animaö nga pöpre äak pitök öng omp nga yaaö pöpëen kööre tok elmëepnaarö. Pël äak pitök pi utpet mowesak ulpëenre poë koröp pim ë rangieëa pöt wa ilak keli moolëak yool moulmëepnaat. Pël äak pim koröpre mësëp kaö nant nak nant es momarëpnaat. 17Yaap, Anutuuk pimtë ngaantakëer kön wia pöl pitëm lupötë kön pout mangkën pit ya pöt mëmpnaat. Ya pöt pit kön kopët naö wieë omën omp ak sak öpëna weëre kosang pitëm pöt animaö pöp mampnaat. Pël ë seim Anutuu akun menautak pet irëpnaat. 18Ēn öng nim itenan pipop ka kësang yang omp akörö ngarangk elmëepna pö.”

Papilon ka kësang pö utpet ëa

18 1Omën pöt pet irën ne kaalak itaangkën ensel munt namp kutömweriaan yangerakël yeiraan itenaut. Pöp Anutuuk weëre kosang kësang mangkën pim ëwaöök yangerak ëwa ë pet yair. 2Pël ëen pi ngön ë olëak epël ya.

“Papilon yok utpet yaë.

Papilon ka kësangö utpet äak kö yes.

Pël ëen peene urmer ke nampre nampre int utpetarö pitëmënt pëen wë.

3 Ka kësang pö utpet yes pöta songönte epël.

Öng pöpök omën nampë muntap wain iit mangkën nak kön irikor yaë pöta ök

omp nga ëëre utpetat kësang ë pël yaaö pöt pet elmëen yang omën pourö tapël ëeim wëaurö.

Pël äak yang omp akörö pit öng pöpring utpetat ëeimaurö.

Pël yaëen öng pöpë omën nant kësang öpnaataan kentre kaur yaaö pötaan

yangerakë omën monere urömatëen ya yamëngkauröak omnant menak pim naëaan sum kësang weima.

Pötaanök kö yes.”

4Pël yaan ne kat wiaan ngön munt nent kutömweriaan epël ya.

“Nem omnarö, ar öng utpet pipop sëp wesak kas seë,

öng pipopring wē saun koirak pötē kangut önganēen.

5 Öng pöpē utpet yaaö pöt kēsang panē sēen

Anutu kutömweri wē pöp itenak utpet kangut mampēnēak kön
wieim wē

6 Ar omēn utpet kangut pi mampunē pörö pim kēlangön omēn
muntarö yemengka pötön kön wiak kangut mampun.

Ar pēl ēēnēak pöt pi omnarö utpet mena ēēn pöt kangiir il wesak
mampun.

Omēn nampē muntap i ngaat mangkēn nak utpet yes pöl öng pöpök
omnarö utpet wesak kēlangön kat mowieima.

Pötaanök i nga kosang panēēt yemangk pöl il wesak kēlangön
kēsang kat mowiin.

7 Pi pimtēn wak isak yeem pim utpet yaautēen ērēpsawi eima pöta ök
arök kangiir kēlangön kat mowiin ing ap.

Pim lupmeri kön korar epēl wieēaup.

‘Ne öng ak kēsangēp yak omp ak urtak wel aisēēē omnarö ngarangk
yaalmēaup.

Ne öng kapiroä ök omnantēen il ngentingenti naēnēp.

Könöm nant nem naē oröön ingre ya ilak naēnganēēp.’

8 Pimtok kön korar pöt wieēa pötaanök kēt kopēt nentak utpet epot
pim naē orööpnaat.

Anutuuk maan yaumanre ngöntök yaaöre ēn ingre ya ilak yaaö pöt
orööpnaat.

Aköp Anutu utpet kangut yemengka pöp weēre kosang kēsang yaaup
yak

puuk maan es kotöpnaat.”

Pēl yaan kat wiaut.

⁹Yangerakē omp ak piiring ya utpet yamēngkem pötēen ērēpsawi
eimaurö öng pöp, ka kaö pö, es yokotön koulöpö ngaarēk yawisēn itenak
pimēen ingre ya ilak apnaarö. ¹⁰Pit Papilon ka kaö pöökē omnaröa
kēlangön kat yawia pöten itenak pitta tapēl ēēpanēak kas ēēn om
kamaarek taueē epēl apnaat.

“O yakom, ka kaöaöön yaköm pan.

Papilon ka kaöaö, 1 aöa akun kot pita öngpök

nim saunatē kangiir utpet yaēn.”

Pēl yaan kat wiaut.

¹¹Ēn yangerakē omēn monere urömatēen ya yamēngkauröeta
omnaröak pitēm naēaan urömat kaalak sum naēpan pēl wesak
pimēen ingre ya ilak apnaarö. ¹²Pitēm uröm pöt epot. Koolre siluwa,
kēl ompyaut, polere kal, songre sar, poē koröp ke naöre naö ompyaö
retēngretēng äaut, kēra köp nga kamp ke nampre namp yaautre omēn
nant kēra sum kēsangötök ket äaut, aini parasre yaap, kēl retēngretēng

äautök ket äaut, ¹³ omēn kamp ompyaö këra koröp neweriaan yewaut yapinte sinamon pël yema pötre ewamöt, këra ëpre kömau nga kamp ompyaut, wainre i kolap kaömp ar ëëpnaat, korupaë lölöpöt, pol purmakaöre sëpsëpörö, pol osöröere ën kaar pitēm wii ngan äak wak weruak yaautre, ën omēn inēen yaauröere, pitēm sum yaaö pöt pipot.

¹⁴ Omēn monere urömatēen ya yamëngkauröak öng pöpön epël ya.

“Omēn nant nim ömëak kent kön yawian pöt sasa won yes.

Monere këere kaömpre omēn ompyaö ë rangi pötta won yes.

Pötaan omēn pipot pout kaalak naöngan, won pan.”

¹⁵ Pël äak omēn monere urömatēen ya yamëngka pörö omēn ke pilöt pim naë sum yeëa pörö Papilon ka kaö pöökë omnaröa këlangön kat yawia pöten itenak pitta tapël ëëpanëak kas ëen om kamaarek tauëë ingre ya ilak äak epël apnaat.

¹⁶ “O yaköm, ka kësangöön yaköm pan.

Ka kësang epö öng nampë ök.

Pi ulpëen ompyaö retëngretëng köp nentepar möa namp mëak pim koröpöök koolre songre sar ë rangiak wëaup.

¹⁷ Akun kot 1 aöa pöta öngpök pim monere uröm pout kö yes.”

Ën i kaö wangatë ngarangk pöröere omēn narö wangat wak ka muntatë yes piporö, wangatë inēen yaauröere omēn i kaö pöök mon ya yamëngka pörö pourö pit Papilon kak pëlëer wiaan kamaarek tauëë ¹⁸ itaangkën ka pö es yokotem koulöpöt oröak yesën itenak ngön äak epël yema. “Elei, ka kësang epöökë ök naö e nerek wi naön, won pan.” ¹⁹ Pit pël mëak kaplak ilaimeë ingre ya ilak äak epël aim wë.

“O yaköm, ka kësang epöön yaköm pan.

Wangatë ngarangk yaaurö tiar ka kësang epöökë urömat wak yesem monere uröm kësang weimaurö.

Akun kot 1 aöa pöta öngpök ka epö kö yes.

²⁰ Kutömweri ngëëngköröere Anutuu ngön yaaöre tektek ngön yaaö omënere pim omēn muntarö ar ka pö won yes pötaan ërëpërëp ëen.

Ka pöök utpet elnieima pötaan Anutuuk kangut yamangk.”

Pël yaan kat wi aut.

²¹ Ën ne kaalak itenaan ensel weëre kosangring nampök kël kësang panë naö wak wal äak i kaöök yoolëem epël ya.

“Nem këlö i kaöök yoolak epël

Anutuuk ka kësang Papilon pö utpet wasën sasa kö sën kaalak itnaangkan.

²² Pël ëen intöere iraö ngön aöre pëep mëmpö,

polere kuup ngön aö pöt ka pöökaan kaalak yaan kat nawiingan.

Ën omnaröakta ka pöök ya ke nentere nent yamëngkën itnaangkan.

Korupaëta kas yamöem yaan kat nawiingan.

- 23 Ka pöökaan es rampe neues kaalak ěwa naĕn ěĕpnaat.
 Öngre omp yaĕĕn ipre kĕr yemangka pötenta itnaangkan.
 Ngaantak ka pöökĕ omĕn monere urömatĕĕn ya yamĕngkaurö
 yangerakĕ kaö sak wakaimaurö.
 Ēn ka pöökaan naröak kempre tĕptĕp wak yeem omĕn muntaröen
 morök elmĕeimaurö.
- 24 Papilon ka kĕsang pöökĕ omnaröak Anutuuk tektek ngön yaaö
 omĕnere pim omĕn muntarö mĕneima.
 Ēn yang omĕn naröeta kööre toköröak mĕneima pĕl ěautĕ saunat
 Papilon ka kĕsang tapöök wieĕa.
 Pötaanök Anutuuk kangut yaalmĕ.”

Omnařö Papilon kaö utpet yesĕn ěrĕpĕrĕp ěa

- 19** ¹Ne omĕn pötön itenak kat wiaan kutömwĕriaan omĕn kĕsang
 pan ngön ě olĕak epĕl ya.
 “Tiar Anutuun yaya mĕpa.
 Tiarim Anutu tapöpök tiar utpetetakaan kama nuwa.
 Ē rangiere weĕre kosang pipot pim naĕ wia.
²Pi tapöpök pim ngön yaatak omnařöa wĕwĕat wotpil wesak wĕl yaaup.
 Öng omp nga yaaö pöpĕ utpet pömpĕlök yangerakĕ omnařö utpet
 moweseima.
 Pĕl ěĕn Anutuuk pi utpet kangut mena.
 Öng pöpök Anutu inĕĕn ru narö mĕneimaup. Pötaanök kangiir
 elmĕa.”
- ³Pĕl ěak pit kaalak ngön ě olĕak epĕl ya.
 “Anutuun yaya mĕpa.
 Ka kĕsang pö es yokotem koulöpö kĕt ěl epotĕ aprö seim wĕ.”
- ⁴Pĕl yaan ngarangk 24 pöröere kutöm omĕn mor kong nent wĕwĕetaring
 pörö pit rar rĕ mowesirak tok oriak Anutu pim omp ak urtak wel aisĕĕĕa
 pöpön yaya mĕak epĕl ya.
 “Yaap, Anutuun yaya mĕpa.”
- ⁵Pĕl yaan kat wiaan Anutu omp ak urta naĕaan ngön ěak epĕl yeem ya.
 “Anutu inĕĕn ruurö, ar pourö tiarim Anutuun yaya maĕ.
 Piin kasinkasin yaaö kotre kaö pourö pĕl ěĕĕ.”

Sĕpsĕp Ruup öng koirĕn pim ipre kĕr mampna akun kĕsangĕt oröa

- ⁶Ngön pöt ě pet yairĕn ne kaalak kat wiaan ngön munt nĕmpĕlök omĕn
 kĕsang pan rongan ěak wĕ ngön kaĕp aöre i kĕsang nant nga yaurem kuk
 aö, tangre kaö kĕsang yeraan nga ngön aö pĕl yaĕ pöl ngön ě olĕak epĕl
 yeem ya.
 “Anutu tiarim Aköp weĕre kosang pout wieĕaupök peene kĕsang
 panĕ sak wĕ omnant pout ngarangk yaalni.

Pötaanök piin yaya mepa.

⁷Sëpsëp Ruupë öng koirëpna akunet yok yaaröön öngöp piin korkor yaë. Pötaanök tiar kön ompyaö wieë ërëpërëp kësang panë yeem, pim yapin pingetakëër wak isak aim öpa.

⁸Anutuuk öng pöp ulpëen ompyaö ëwaëwa yaaö kewil won panë namp mëpënëak mena.”

Ulpëen ompyaö pöp Anutuu omnaröa wëwë ompyaö wotpilten ya.

⁹Enselëpök neen epël ök yenëa. “Ni ngön epël retëng ë. Omën Anutuuk Sëpsëp Ruupë öng koirëpna akunetak kaömp ngawi nëmpënëak yas mëëaö pörö ërëpërëp ëëpnaarö.” Pël neak kaalak epël yenëa. “Ngön epët Anutuu ngön kë panëët,” pël neeaut. ¹⁰Pël neaan ne piin yaya mamëak pim ingesiarë ikanöök rar rë mowesirak tok yariin epël yenëa. “Neen pil elnëengan. Anutu pimtënökëër yaya mam. Niire nim kar Yesuu ngönte ök yak pörö tiar ya kopët nent ngawi yamëngkaurö.” Yesuu ngönte ten kaamök elmëen tektek ngöntak aöre songönte tekeri wesak aö pël yeë pöt Pulöökë yaat.

Omën pol os kölamöpë rangk wel aisëëëa pöpë ngönte

¹¹Ngön pöt ök neë pet irën ne itenaan kutömwer kan tëen pol os kölam namp wëen itenaut. Omën namp pöpë rangk wel aisëëëa pöpë yapintepar nent, “Yaat wotpil yamëngkaup,” ën nent “Ngön yaap yaaup,” pël ya. Omën pöp pi omnarö ngön yaatak ulmëak kangut mampööre nga elö pël yeem wotpil yaaup. ¹²Pöpë itöörar pöt, es wëlëngöökë ököörar. Ën kepönöök pöt, omp ak ul nant selap waëëëa. Pim koröpöök pimtë yapinte wieëa. Pöt pimtökëër ëwat, omën muntarö köpël wë. ¹³Pim ulpëënëpök omën iitök petak urak wëa. Ën pim yapinte pöt, omnaröak piin, “Anutuu ngönte,” pël yamëëaup. ¹⁴Pël ëen kutömweri nga omnarö ulpëen ompyaö kölam panë kewil won narö mëak pol os kölam naröa rangk wel aisëak omën pöpë ënëm yes. ¹⁵Omën pöpë këmtakaan öp nga panë newer oröak irëëëa. Öp pöwerring yang omën pim kööre tokörö mënak weëre kosangring ngarangk elmëëpnaap. Puuk wii wain ulöpörö kël kap kësang nentakaan ing mësaan iit yaarö pöl omnaröen Anutuuk ya sangën elmëak mëngkën pitëm iit orööpnaat. ¹⁶Pöpë ulpëënëpökre kopirak pim yapinte epël retëng ëëëa. “Omën omp aköröa Omp Aköp, isauröa Kaöap.”

¹⁷Ne kaalak itaangkën ensel namp këtëpök taueëa. Pël ëëë ngön ë olëak int ngaarëk wal ëak yauröen epël yema. “Ar pourö Anutuu këere imën nënëën wais rongan ëëë. ¹⁸Ar omën omp aköröere nga omnaröere pitëm wotöököröere pol osöröere pitëm rangk wel aisëak wë pörö pourö, inëen yauröere yaap wëaurö, kotre kaö, pit pouröa mësepöt nënëën wais rongan ëëë.”

¹⁹Pël yemaan ne itaangkën animaö nga pöpre ën yangerakë omp aköröere pitëm nga omnarö pit Yesu pol osöpë rangk wel aisëëëaupre pim

nga omnaröaring nga elëpënëak rongan äak wëa. ²⁰Pël ëen puuk animaö pöpre ën tektek ngön yaaö kaar omën pöp wali yeö. Tektek ngön yaaö omën pöp pi wet réak ya it ngolöpöt animaö pöpë ëöetak mëneimautak omën animaö pöpë yapinte pitëk mowiak animaö kön pimtë ket ëa pöpönta yaya maima pörö morök elmëeima. Pël ëen omën utpet pöaar wak öngöp kësang i kaöökë ököök kël kop retëng ka urauuk es yokota pöwesi yemoola. ²¹Pël äak omën pol osöpë rangk wel aisëëea pöpök nga omën utpet pöaarë naë wëaö pörö pim öp nga panë këmtakaan oröëea pöwerring mën wel yemowi. Pël ëen intöröak wais omën mëna pöröa mësepöt wa neim olëak kep panë yaë.

Seten pi wii kaatak moulmëepnaap

20 ¹Ne kaalak itaangkën ensel namp yang öngöp waliöökë kietaring wii seen naö wali wak kutömwëriaan yeirëa. ²Pël äak ensel pöpök kamal kësang ngaan panëër wë Anutuu ëöetak omnaröaan utpet wesak aim wëaup, Seten, pöp enselëpök wak krismaki 1000 pötë öngpök öpënëak wii seen pööring të yemowi. ³Pël äak enselëpök wa yang öngöp wali pöökë öngpök moolëak kaalak kan wariak taë panë wes yemoulmë. Krismaki 1000 pöt won nasën wiaan yang omnarö kaalak morök elmëëpanëak pël yaalmë. Ēnëmak krismaki 1000 pël won sëënak orö moulmëen akun kot panë nent öpnaap.

⁴Ne kaalak itaangkën omp ak ur nant wiaan pötë omën narö wel aisëëea. Anutuuk pit omën muntarö ngön yaatak moulmëak kangut mampna ya pöt mangkën wak wëa. Pël ëen ne itaangkën omën naröa könörö Yesuun kön wi kosang wesak pim yapinte tekeri wes ök aö yeem Anutuu ngönte kosang wes moröak wëa. Pitëm pël yaaö pötaan kööre toköröak ngernger il moolaan wel wia. Omën pörö animaö nga pöpre pim kön ket ëa pöpëen yaya maöre pim yapinte pitëm ë kosatëëre morötë mowi pël naën ëa. Pitökëër Anutuuk weletakaan wal ë moulmëen wë Kristooring omp ak sak ngarangk wakaimëë së krismaki 1000 ke pipël won yes. ⁵Pitëm weletakaan wal ë moulmëa pöt wet réaut. Ēn omën munt wel wia pörö wal naën wia. Pit krismaki 1000 pöt won sëënak wal ëëpënëak kor wë. ⁶Omën Anutuuk wet réak weletakaan wal ë moulmëa pörö ngëengk mowasën ërëpërëp eim öpnaarö. Omën pörö kaalak wel wiak es parëaöök nasën ëëpnaarö. Pit kiri ar yauröa ök sak Anuture Kristoon yaya yamëem Kristooring omp ak sak ngarangk yaat mëneim wëen krismaki 1000 ke pël won sëpnaat.

Seten pim këlangön kaö panë kat wiipnaata ngönte

⁷Krismaki 1000 pöt won sëënak Seten wii kaataakaan kan të mowiin örööpnaap. ⁸Pël äak yang kaö nantëaan nantë wëa pörö pouröa naë së morök elmëen rongan nentepar ëen Kokre Mekok pël sëen nga wa

top ēēpnaat. Pël ēēpna pörö pangk sangk nekelngan, i pisötē ök kēsang panē ēēpnaat. ⁹Omēn pörö yang kaö poutēaan wais Anutuu omnaröere Yerusalem ka kēsang pim kent kön wia pö wa taap äak mēmpēnēak yaēēn Anutuuk es newes kutömweriaan wes mēēn irē omēn pörö es kot won wasēpnaat. ¹⁰Pël ēēn Seten pit morök elmēa pöp puuk wak öngöp kēsang i kaöökē ököök kël kop retēng ka urauuk es yokota pörek animao ngaapre tektek ngön yaaö kaar omnamp wet rēak wa moolaan wēa pōwesi moolapnaat. Pël ēēn pit omēn naar namp pörö röökre kēt poutē es yokotön kēlangön kēsang kat wieim öpnaarö.

Ngön ya kēsang mēmpnaata ngönte

¹¹Ne kaalak itaangkēn omp ak ur kölam kēsangētere pötak wel aisēēa pöpön itenaut. Pël ēēn kutömre yanger pim naē mop wiak won yes. ¹²Pël yaēēn itaangkēn omēn wel wiaurö kotre kaö omp ak urtak wel aisēēa pöpē ēöetak taueēa. Pël ēēn pep nant yawil. Pël äak newer yawil. Pöwer wēwē kosangta pepewer. Pël äak puuk omēn wel wiaurö pitēm wēwēatē songönöt pep pötē iteneē wël yaalmē. ¹³Pël ēēpēnēak omēn i kaöök wel wiaurö i kaöökaan wal yaē. Yaap, omēn wel wia pourö weletekaan wal ēēn neenem wēwēatē kangut yemangk. ¹⁴Pël äak welere wel kaö wak öngöp kēsang i kaöökē ököök es yokota pōwesi moolaan kö yes. Omēn pörek sēpna pörö wel 2 kosang pöt wiak sasa kö sēpnaarö. ¹⁵Anutuuk itaangkēn omēn namp pim yapinte wēwē kosangta pepeweri won ēēn pöt wak öngöp kēsang i kaöökē ököök es yokota pōwesi yemoola.

Kutömre yang ngolöpöt yaarö

21 ¹Ne omēn pötön itenak kaalak kutöm ngolöpwerre yang ngolöpren itenaut. Kutömre yang wet rēak oröak wiakaima pöt kö sak sēēn i kaööta won wieēa. ²Pël ēēn ka kēsang ngēēngk Yerusalem ngolöpöön itenaut. Ka ngolöp pö Anutuu naē kutömweriaan yeiraan itenaut. Pö ē rangi ompyaö panē nant äak wēa. Pöt öng namp pim omp yaö äak wēaup öpēnēak ē rangiak wē pöl äak yeira. ³Pël ēēn ne kat wiaan omp ak urta naēaan ngön äak epël ya. “Kat wieē. Anutu pi pim omnaröa tektrak wē. Pi pitring wēēn pit pim omēn sak öpnaarö. Ēn Anutu pimtök pitēm naē wē pitēm Aköp pël sak wakaim öpnaat. ⁴Pël äak puuk pitēm ing telapöt tum mokorön ērēpērēp ēēpnaat. Pöt pit kaalak wel wiire ēn kön utpetaring wē, ingre ya ilak aöre kēlangön kat wi pël naēn ēēpnaat. Omnant ngaan wiakaima pöt pout won sa pötaanök.”

⁵Pël yaan omēn omp ak urtak wel aisēēa pöpök epël ya. “Kat wieē. Ne peene omnant pout ngolöp wesak orö yaulmē.” Pël ök äak neen epël yenēa. “Ngön epot yaap panēēt, omnaröa kön wi kosang wasēpnaat. Pötaanök retēng ē.” ⁶Pël neak kaalak epël ök yenēa. “Omēn epot pout yok oröak wē. Ne tapöp wot rēaupök kaalak ēnēm remaap. Omnant

ngës rë ulmëaupök kaalak pet irumaap. Omën namp iiten yaëen pöt nook i omnaröa kol mangkën nak wëwë kosangta yaö sëpnaat sum won mangkën nëmpnaap. ⁷Omën namp pim wëwë ompyautak utpetat il wasëpna pöp omnant ompyaö epot poutë pep sëpnaap. Pël ëen ne pim Anutu pël sak wëen pi kangiir nem ruup pël sak öpnaap. ⁸Pël ëëpnaatak omën toköröen kas ëak neen kasëng nampööre kön wi kosang nenewasën ë, ya utpet ke nentere nent mëmpööre omën muntarö mën wel wi, öngre omp nga ëëre kipre këar nga ë, Anutuu urtak omp ak kaaröröere kön ket ëauröaan ngëëngk wesak yaya aöre ngön kaar aö, omën ke pil yaaö piporö pourö öngöp kësang i kaöökë ököök kël kop retëng ka urauuk es yokota pöwesi së es koteim öpnaarö. Pël yeem wel akun 2 kosang pöt wiak sasa kö sëpnaarö.”

Yerusalem ka ngolöpö

⁹Pël neaan ensel 7 pöröakaan namp nem ngësë waisa. Ensel 7 pörö pit söwar 7 ëak omën utpetatta 7 tapël ëak wiak wak wëa. Pöt ënëmak akun pet irëpënëak yaëen omnarö utpet mowasëpnaat. Pöröakaan namp nem naë wais epël yenëa. “Ni wais. Pël ëen Sëpsëp Ruupë öng koirëpnaapön pet elniimaan,” pël yenëa. ¹⁰Pël neaan Pulöökë weëre kosangö nem naë oröön ensel pöpök ne wa newak së tomön wali panë naöök neulëak Yerusalem ka ngëëngkö Anutuu naë kutömweriaan yeiraan pet elnëen itenaut. ¹¹Ka kësang pöök Anutuu ëwaö elën ëwa ke maim nal panë tëak wieëa. Pöt yaap kël ompyaö saspaare ën könitweri yaë pöl pan ëwaëwa yeem wëa. ¹²Yerusalem ka pöök ëm kësang wali panë naö ök rëëëa. Ëm pöök kan 12 ëak rë wieëa. Pël ëen ensel narö 12 tapël ëak kan ëëtë ngarangk taueëa. Kan pötë Israel omën kur 12 piporöa yapinöt retëng ëëëa. ¹³Ëm këtëpë yengampial pöök kan neraar ner ëak rë wieëa. Këtëpë yeilëaul we pöökël kan neraar ner tapël ëak rë wieëa. Ën we naöökaan naöökta om tapël ëëëa. ¹⁴Ëm pöökë ingöök kël 12 ëak kosang wesak wieëa. Kël pötë Sëpsëp Ruupë ngön yaaö omën 12 pöröa yapinöt retëng ëëëa.

¹⁵Ensel neen ngönaak neea pöp pi këkalëp ök yawia koolötök ket ëa naö wali wak wëa. Pö ka kësang pööre ëmööre ëm kanöt ök wiipnaö. ¹⁶Ka pöökë ë mor kong nent pötë waliit ke kopëtal pan. Ën ensel pöpök ka pö pim këkalëpööring ök wiin waliire mëntere tingk pöt ke kopëtal yaë. 2400 kilomita pël yaë. ¹⁷Pël ëen enselëpök ökööring ëmöökë tingkët ök wiin 70 mita pël yaë. ¹⁸Ka kësang pöökë ëm pö, kël ompyaö saspa pööring ök rëëëa. Ën ka pö kool pëenëëtök ök raan könitweri ök pengpeng yeëa. ¹⁹Ën ëm pöökë ingöök kël sum kësang yaaö ke naöre naöring ë rangi ulmëëëa. Kël ompyaö wet kaal panë rëak wia 1 pöökë yapinte saspa, ën munt kunöm ka ura 2 pöökë yapinte sapaia, ën munt kölam 3 pöökë yapinte aket, ën munt këra ëp koröp oröa 4 pöökë yapinte emeral, ²⁰ën munt köp möaare

kölam koröp oröa 5 pöökē yapinte satonikis, ěn munt köp möaö 6 pöökē yapinte konilian, ěn munt kop retěng ka ura 7 pöökē yapinte krisolait, ěn munt kěra ěp koröp oröömaap kangk ěa 8 pöökē yapinte peril, ěn munt kop retěng ka urömaap kangk ěa 9 pöökē yapinte topas, ěn munt kop retěngre kěra ěp koröp ka urömaap kangk ěa 10 pöökē yapinte krisopres, ěn munt kunöm ka urömaap kangk ěa 11 pöökē yapinte aiasin, ěn munt köp karkar möa paně 12 pöökē yapinte ametis. Kěl ompyaö 12 epotring ěm ingöök wiak ě rangi ulměěěa. ²¹Ēn ka kan 12 pöt kal kölam sum kěsangring nant 12 pötiring ket ěěěa. Kal naöök kan newer naöök newer pěl ěěěa. Ka kěsangöökě kaměnt pötta koolötök lě měěn könitweri ök pengpeng yeěa.

²²Ne ka kěsang pöök ngěěngk tup nent ök rěan itnaangkěn, won. Aköp Anutu weěre kosang pout wieěaupre Sěpsěp Ruup piarpimtok ngěěngk tup ket ěak wěa. ²³Ka pöök kětre ngoon ěwa naö naěpan, won. Anutuu ěwaöök sě elěn Sěpsěp Ruup es rampewesi ök ket ěak ěwa ěěn ka pöök ěwa těak wia. ²⁴Yangerakě oměn pourö ka pöökě ěwaöök kan ing yaaurö. Ēn yangerakě omp akörö pitěm ě rangiat ka pöökě wak sěpnaarö. ²⁵Ka pöök koö noolapan. Pötaanök kět poutě ka pöökě ěm kanöt tě wiakaim öpnaat. ²⁶Pěl ěěn oměn pourö pitěm monere urömere ě rangiat pout ka pöökěl wak sěpnaat. ²⁷Pěl ěěpnaatak oměn wěwě utpet ke nentere nent yaautre kömkěěnringöt yaautre kaar yaaut pangk wak ka pöökě öngpök nasěpan, won. Om Sěpsěp Ruupě yapinöt wěwě kosangta pepeweri retěng ěa pöröakěěr ka kěsang pöökě öngpök sěpnaarö.

Wěwě kosangta iitere kěraament

22 ¹Ensel pöpök kaalak ka pöök i omnaröa kol mangkěn nak wěwě kosangta yaö yesa pömerěn pet elněěn itenaut. I pömer könit ket ěak ěwaěwa yaamer Anuturě Sěpsěp Ruupě omp ak urtakaan oröak yesaumer. ²I pömer ka pöökě kamtaöökě luptak yesaumer. Ēn i pömeri poö naöökaan naöök kěra nant wěwě kosangět yemengka pöt tau seěa. Pöt krismaki kopět nenta öngpök akun 12 ěak ulöpörö ngoon nampnampě öngpök utö aprö yesa. Kěra pötě ěpötök omnaröa kělangönre yaumanöt ompyaö yemowesa. ³Omnant pout Anutuuk won wiaapěněak kön wiaut ka pöök wi naöpan. Om Anuturě Sěpsěp Ruupě omp ak uröt ka kěsang pöök wiaan Anutuu iněěn ruurö piin yaya maim öpnaat. ⁴Oměn pörö pim kěěre wot kanten itaampnaat. Pěl yaěěn pim yapinte pitěm ě kosatě wiaapnaat. ⁵Ka pöök koö olaan es rampeere kětěpök ěwa naěpan, won. Aköp Anutu pimtě ěwa kěsang pömpělök ěwa elměaan pit omp ak sak akun ělötě om omnant poutě ngarang wakaim öpnaarö.

Yesu pi teěnt kaalak waisěpnaap

⁶Ne pötön itanaan enselěpök epěl ök yeněa. “Ngön epot pout yaap paněět, omnaröa pangk kön wi kosang wasěpnaat. Aköp Anutu pim Pulö

tektek ngön yaaö omnarö kaamök yaalmë pöpök pim inëen ruurö omën peene orööpnaatön ewat sêpënëak pim ensel namp pitëm naë wes mäa.”

⁷Pël yenëaan Yesuuk epël ök ya. “Kat wieë. Ne teëntom waisumaap. Omën namp nem tektek ngön pep epweri wia epot ngaarëk weim öpna pöp pi ërëpërëp ëëpnaap.”

⁸Ne Sonok ngön epot kat wiak omën epotön itenaut. Ne epotön kat wiire itaampö pël ëak ensel ök neeaöre pet elnë pël ëaö pöpë ingesiareë ikanöök rar rë mowesirak tok oriak piin yaya mamëak yaëen ⁹epël yenëa. “Ni neen pil elnëëngan. Anutu pimëntenökëër yaya mam. Niire nim kar tektek ngön yaaöre omën pourö ngön pep epweri wia pöt ngaarëk yeö pörö tiar ya kopët nent ngawi yamëngkaurö pötaanök.” ¹⁰Pël neak pi kaalak epël ök yenëa. “Anutuu ngön pep epweri wia epot ngep ëak önganok. Ngön pötë këet orööpna akunet temanöm yes. ¹¹Omën wëwë utpet wëa pöp piita om yal menak pël ë seim öp. Kewilring wëa pöp piita om yal menak pël ë seim öp. Wotpil wëa pöp piita om yal menak pël ë seim öp. Ēn lup kölam wëa pöp piita om yal menak pël ë seim öp.”

¹²Pël yenëaan Yesuuk kaalak epël ök ya. “Kat wi. Ne teëntom pan waisumaap. Ne omën pouröa sumat wak wais pitëm omnant yaautë kangut neenemot mempaap. ¹³Ne tapöp wot rëaupök kaalak ënëm remaap. Ne omnant ngës rë ulmëaupök kaalak pet irumaap.

¹⁴“Omën pitëm ulpëënöt iirak lup kölam wë pörö pit ërëpërëp ëëpnaarö. Pël ëak këra wëwë kosangët yemengka pömentëkaan yok pangk ulöp tö nak ka kësangöökë ëm kanöt të wiaan öngpök ilapnaarö. ¹⁵Pël ëëpnaatak omën ke epëlörö ka pöökë öngpök neilapan, om ka tomök öpnaarö. Kentre pol ket ëak wëwë kewilring wëere kipre këar nga ë, öngre omp nga ëere mën wel wi, Anutuu urtak omp ak kaaröröere kön ket ëauröaan ngëëngk wesak yaya maö, ngön kaar aöre pötë ënëm ë, omën ke pil yaaö pörö ka tomök öpnaarö.

¹⁶“Ne Yesu nook nem ensel namp wes mëen wais ar ingre mor sauröen ngön ök niia. Ne Tewit pim kurmentëkaan oröaup. Ne tapöpök tangewesi ök ëwaaringëp.”

¹⁷Pulööre Sëpsëp Ruupë öng yaup piaripök, “Ni wais,” pël ya. Pël ëen omën namp ngön pipët kat wiak pöt puukta, “Ni wais,” pël ap. Yaap omën namp iiten yaëen pöt waisëp. Pi i omnarö kol mangkën nak wëwë kosangta yaö yesa pöt nëmpënëak kent yaëen pöt nëmp. I pöt sum won, yaap nëmpnaat.

¹⁸Ar Anutuu tektek ngön pep epweri wia epot sangk kelak kat wiinëeröaan pepanöm ngön epët ök yeniak. Omën namp Anutuu ngönte wak pim könöökaan ngön munt nantring yal menak irikor ëëpna pöp Anutuuk maan omën utpet nant omnarö utpet mowasëpna pep epweri retëng ëa pöt pim naë orööpnaat. ¹⁹Ēn omën nampök pep epweriaan Anutuu ngön nent këre olëak irikor ëëpna pöp Anutuuk kangiir piin epël

mapnaap. “Këra wëwë kosangët yemengka pömentëkaan ulöp tö nëere ka kësang ngëengki epöök wë nem omnaröa ëëpënëak pep epweri ngön ëa pöl naëngan.”

²⁰Ngön epot tekeri wesa pöpök epël ya. “Yaap, ne teënt waisumaap.”
Yaap. Aköp Yesu, ni wais.

²¹Aköp Yesu pim komre kolap pöt Anutuu omnarö arim naë wiaap.
Yaap.